

四庫全書

集部

欽定四庫全書

集部
駱丞集卷二

詳校官監察御史臣劉湄

檢討臣何思鈞覆勘

總校官編修臣王燕緒

校對官中書臣潘曾起

謄錄監生臣李維翰

欽定四庫全書

駱丞集卷二

唐 駱賓王 撰

明 顏文選 註

五言排律

浮查詩

有序

查義見高四
篇仙查註

遊目川上觀一浮查泛泛然若木偶之乘流迷不知所適也

田文將入秦蘇代謂之曰旦見木偶人謂木偶人曰
天雨子將敗矣土偶笑曰子東國之桃梗也天雨我
敗歸土耳子泛泛焉流子而行未知所止息也秦以虎
狼之國子欲入秦如不還得無為土偶所笑乎文乃止
觀其根柢盤屈枝幹扶疎大則有棟梁舟楫之材小則
有輪轅榱桷之用非夫稟乾坤之秀氣含宇宙之淳精
孰能負凌雲曄日之姿抱積雪封霜之骨

韓非子樹木直根為根蔓根為柢固其柢則生長深
其根則視久東漢虞詡曰不遇盤根錯節無以別利
器枚乘七發龍門之桐高百尺而無枝中鬱結之輪
菌根扶疎以分離說文扶疎四布也劉向曰今濟南
王氏祖墳梓桂生枝葉扶疎上出屋根垂地中上下
四旁曰字往古來今日宙宇出尸于楊子太元閨天

謂之字闕字謂之宙滿山一名天柱山三峯鼎峙拒
雲際日曹植詩承露槃太清晉張協七命寒山之桐
零雪寫其根霏霜封其條陸機
詩嘉樹生朝陽凝霜封其條

向使懷才幽數藏頽重品絕望於廊廟之榮遺形於斤
斧之患固可垂陰萬畝懸映九霄與建木較其長短將
大椿齊其年壽者

數見詠水頽與頽同毛遂傳使遂早得處囊中乃脫
穎而出道書天有九霄赤碧青元絳紫練縉吳都
賦木則楓桺豫章枌櫨枸櫟綿杞桵櫨文櫨楨檀平
仲君遼松梓古度楠榴之木相思之樹宗生高岡族
茂幽阜擢本千尋垂陰萬畝張衡思元賦纏建木於
廣都兮拓芳華而躊躇山海經有木若牛引之皮若

櫻名曰建木在弱水上青葉紫莖元華赤實百仞無枝上有九櫚下有九衝大椿見樂大夫挽詩朝菌註

而委根險岸託質畏途上為疾風衝颺所摧殘下為奔浪迅波所激射基由壤括勢以地危

畏途見高四篇
衝颺見螢火賦

豈盛衰之理繫乎時封植之道存乎我一隊泉谷萬里飄淪與波浮沈隨時逝止雖殷仲文歎生意已盡孔宣父知朽質難雕然而遇良工逢仙客牛礪可託玉璜之路非遇匠石先談萬乘之器何遠故用與不用時也悲

夫

殷仲文古樹見在獄詠蟬序唐元宗謚孔子文宣王
呂望釣于牛磯得一魚剖之有五璜丹書文曰周受
命呂封于齊仙客見贈高四篇仙查註莊子人間世
篇匠石之齊至于曲轅見櫟社樹其大蔽牛絮之百
圍其高臨山十仞而后有枝其可以為舟者旁十數
觀者如市匠石不顧遂行不輟弟子厭觀之走及匠
石曰自吾執斧斤以隨夫子未嘗見材如此其美也
先生不肯視行不輟何耶曰已矣勿言之矣散木也
以為舟則沈以為棺槨則速腐以為器則速毀以為
門戶則液構以為柱則蠹是不材之木也無所可用
故能若是之壽匠石歸櫟社見夢曰女惡乎比予哉
若將比予于文木耶夫祖槲摘柚果蓏之屬實熟則
剝則辱大枝折小枝泄此以其能若其生者也故不
終其天年而中道夭自培塿于世俗者也物莫不若

是鄒陽上吳王書曰臣聞明月之珠夜光之璧以暗
投人於道無不按劍相盼者無因至前也端木根柢
輪囷離奇而為萬乘器者何則以左右為之先容也
故無因至前雖隋珠和璧祇足結怨而不見德故有
人先談則枯木朽
株樹功而不忘

然而知萬物之相應感者亦奚必同聲同氣而已哉感
而賦詩貽諸同志云耳

易曰同聲相應同氣相求水流濕火就燥雲從龍風
從虎聖人作而萬物覩本乎天者親上本乎地者親
下蓋各從其類也又曰上下
交而其志同也禮合志同方

昔負千尋質高臨九仞峯貞心凌晚桂勁節掩寒松忽

值風颭折坐為波浪衝摧殘空有恨擁腫遂無庸渤海
三千里泥沙幾萬重似舟飄不定如梗泛何從仙客終
難託良工豈易逢徒懷萬乘器誰為一先容

爾雅八尺曰尋倍尋曰常四尺曰仞書為山九仞顏
師古孔安國皆以八尺為仞巴咸鄭康成以七尺為
仞應劭漢書註以五尺六寸為仞晉書契寒松而立
節吳書王蠋建寒松之節莊子逍遙篇惠子謂莊子
曰吾有大樹人謂之樗其大枝擁腫而不中繩墨其
小枝卷曲而不中規矩立之塗匠者不顧今子之言
大而無用衆所同去也莊子曰子有大樹患其無用
何不樹之于無何有之鄉廣漠之野傍徨乎無為其
側逍遙乎寢卧其下不夭斤斧物無害者無所可用
安所困苦哉山海經東海之別有渤海南海之別有

漲海西海之別有青海北海
之別有瀚海餘俱見上文

春霽早行

年華開早律霽色蕩芳晨
城闕千門曉山河四望春
御溝通太液戚里對平津
寶瑟調中婦金罍引上賓
劇談推曼倩驚坐揖陳遵
意氣一言合風期萬里親
自惟安直道守拙忌因人
談器非先木圖榮異後薪
抑揄慚路鬼憔悴切波臣
元草終疲漢烏裘幾滯秦
生涯無歲月岐路有風塵
還嗟大行道處處白頭新

律見司馬樓段仄註四望見崔駙馬篇御溝見閭五
官篇溝水註在長安漢武帝於建昌宮北治大池曰
太液言津潤所及廣也戚里貴戚之里字見高四篇
爵里義同公孫宏拜相封平津侯梁武帝狹斜行洛
陽有曲陌曲陌不通驛忽遇二小童扶轡問伊宅我
宅邯鄲右易憶復可知大息組細縕中息佩陸離小
息尚青綺總角遊南坡三息俱入門家臣拜門垂三
息俱升堂旨酒盈十卮三息俱入戶戶內有光儀大
婦理金翠中婦事玉鐫小婦獨閒暇調笙遊曲池丈
人少徘徊鳳吹方參差金疊見陳文林詩東方朔字
曼倩善諧謔談論陳遵字孟公名望一時衣冠懷之
惟恐在后時列侯有與遵同姓字者至門坐中震動
既而非孟公因號陳驚坐云意氣見高四篇因人先
木見上篇先容註汲黯為九卿公孫宏張湯為小吏
及宏湯稍益貴與黯同列后又專用過之黯褊心不
能無小望見上前言曰陛下用羣臣如積薪後來者

居上上默然晉有為太守者羅友后至桓溫問之對曰路逢鬼柳榆曰見汝送人作郡不見人送汝作郡波臣見上裝侍郎詩漢哀帝時丁傅董賢用事諸附離之者起家至二千石惟楊雄自守泊如也乃草太元以儼易三方九州二十七部八十一家七百二十九贊為天地人三元各二十七首人有嘲雄以元之尚白雄解之為之說曰解嘲烏裘滯秦見高四篇莊子養生篇吾生也有涯而知也無涯以有涯隨無涯殆已註言所稟之分各有極也而心之所欲無限隨之斯困殆矣岐路見紫雲觀篇陸士衡詩京洛多風塵素衣化為緇戰國策魏王欲攻邯鄲季梁聞之中道而反衣焦不信面塵不洗往見王曰今者臣來見人于太行乃北面而驅其馬告臣曰我欲之楚臣曰之楚奚為北面曰吾馬良臣曰此非楚之道也曰吾善御此數者適善而去楚適遠耳又汗明見春申君曰騏之齒至矣服鹽車上大行中坂遭延負轅不能

上伯樂遭之下車攀而哭之解紵衣而幕之於是俯
噴仰鳴聲造于天欣伯樂之知己也白頭新見螢火
賦白首註阮籍咏懷詩平生少年時輕薄好絃歌西
遊咸陽市趙李相經過娛樂未終極白日忽蹉跎驅
馬復來歸反顧望三河黃金百鎰盡資用常苦多北
臨大行道失路將如何又不涉大行路誰知斯路難
太行在今衛輝府輝縣西
五十里西南連懷慶府界

秋日山行簡梁大官

東馬陟層阜迴首睇山川攢峯銜宿霧疊巘架寒烟百
重含翠色一道落飛泉香吹分巖桂鮮雲抱石蓮地偏
心易遠致默體逾元得性靈遊刃忘言已棄筌彈冠勞

巧拙結綬倦牽纏不如從四皓邱中鳴一絃

史記齊桓公束馬懸車登太行至卑耳山楚詞既合
睇兮又宜笑睇視也謝瞻答靈運詩西瞻興遊歎東
睇起悽歌顏延年詩側聽風薄木遙睇月開雲江淹
擬謝莊詩靜默鏡錦野四睇亂層吟擬惠連詩覲于
杳未僂歎睇在何辰攢山疊出如攢槩也張協北邙
賦松林慘映以攢列元木樓廖而振柯嶽山頂也詩
大雅公劉篇陟則在嶽靈運詩連嶂疊嶽崿青翠杳
深沈泉自山頂流下者曰飛泉巖桂見高四篇陸機
悲哉行鮮雲垂薄陰註輕雲也太華山有石蓮峯陶
靖節詩心遠地自偏楊雄解嘲知元知默守道之極
又曰蘭生收功于章臺四皓采榮于南山公孫創業
於金馬驃騎發迹于祁連司馬長卿竊貨于卓氏東
方曼倩割炙于細君僕誠不能與數子並故默然獨
守吾太元莊子養生篇庖丁為文惠君解牛曰臣之

刀十九年矣所解數千牛而刀刃若新發于硎彼節
者有間而刀刃者無厚以無厚入有間恢恢乎其於
遊刃必之餘地矣忘言棄釜見高四篇王陽與貢禹
為友陽刺益州禹聞之彈其冠以待陽遂薦禹成帝
召為大夫時人語曰王陽結綬貢禹彈冠又后漢蕭
育與朱博為友長安語曰蕭朱結綬王貢彈冠言共
相薦達也潘岳性輕躁趨勢利與石崇諂事賈謐望
塵而拜為謐二十四友之首其母數誚之曰汝當如
是而乾沒不已乎岳終不改既仕官不達乃作閑居
賦曰岳讀汲黯傳至司馬安四至九卿而良史書之
題以巧宦之目未嘗不慨然廢書而歎也曰嗟乎巧
誠有之拙亦宜然註黯姑姊子司馬安少與黯為洗
馬安文深巧善宦四至九卿守河南卒昆弟以安故
同時二千石者十人漢高欲易太子呂后使張良為
計良曰此難以口舌爭也願上所不能致者四人曰
東園公綺里季夏黃公角里先生以上嫚士不願為

漢臣令太子請以爲客此一助也后令太子卑詞厚幣往請之既至鬚眉皓白自爲四皓竟定惠帝顧愷之爲謝鯤畫像曰此子宜置邱壑中三國孫登汲郡人于北山爲土窟居之好讀易嘗撫一絃之琴拾遺記商時修三皇五帝之樂撫一絃之琴左思招隱詩杖策招隱士荒塗橫古今岩穴無結構邱中有鳴琴白雲停陰岡丹朶曜陽林石泉漱瓊瑤纖鱗亦浮沈非必絲與竹山水有清音何事待嘯歌灌木自悲吟秋菊兼餽糧幽蘭開重襟躊躇足力煩聊欲投吾簪郭璞客傲戰機心於外物不能得意于一絃陳伏招隱詩招隱訪仙槿邱中琴正鳴梁庾吾贈周處士詩離下黃花菊邱中白雪琴

晚度天山有懷京邑

天山見贈
高四篇注

忽上天山路依然想物華雲凝上苑葉雪似御溝花行
歎戎麾遠坐令衣帶賒交河浮絕塞弱水浸流沙旅思
徒漂梗歸期未及瓜寧知心斷絕夜夜泣胡笳

上苑上林苑也御溝見春霽早行篇雲葉見白雲抱
幽石篇雪花見詠雪篇上苑御溝皆懷京邑也麾見
蕩子從軍篇衣帶賒猶沈約所謂帶圍減尺言瘦也
謝元暉和王主簿怨情詩相逢詠靡蕪辭寵悲班扇
花叢亂數蝶風簾入雙燕徒使春帶賒坐惜紅粧變
平生一顧重夙昔千金賤交河在土魯蕃西二十里
源出天山河水交流繞斷峯下夷名崖兒城即唐交
河縣禹貢導弱水又西被于流沙鄭元曰弱水出張
掖淮南子云出窮名山柳宗元曰西海之山有水焉
散渙無力不能負芥投之則委靡墊沒及底而后止

流沙在沙州西八十里其沙隨風流行故曰流沙沈括曰嘗過無定河活沙履之百步之外皆動如行幕上或陷則人馬車駝以千百數無孑遺者或謂此所謂流沙也楚詞註流沙亦引禹貢復言今西海居延澤是也則括之言或信蓋弱水至于合黎餘波入于流沙則流沙皆弱水所及陷人亦有之矣漂梗見浮查篇泛梗註左傳齊侯使管至父戍葵邱瓜時而往曰及瓜而代期戍公問不至請代不許遂作亂註瓜時瓜熟時也茄見蕩子從軍篇李陵答蘇武書涼秋九月塞外草衰夜不能寐側耳遠聽胡茄互動牧馬悲鳴吟嘯成羣邊聲四起晨坐聽之不覺淚下魏瓘搗衣賦但見餘韻未畢微影方流逶迤洞房半入霄夢窈窕聞館方增客愁李都尉以胡茄動泣而子期以隣笛增憂古人獨感于聽而今者況兼乎秋

晚泊河曲

河曲漢縣名屬太原郡晉為嵐州雄勇鎮宋立
火山軍屬代州后置火山縣尋廢金改火山州
后改澳州貞元初增置河曲縣取河千里一曲
之義元至元初州縣俱省入保德州今復為河

曲縣屬
太原府

三秋倦行役千里泛歸潮
通波竹箭水輕舸木蘭橈
金隄連曲岸貝闕影浮橋
水淨千年近星飛五老遙
疊峯開宿浪浮葉下涼颿
浦荷疎晚的津柳漬寒條
悽惶勞梗泛淒淒斷倦蓬
飄仙查可不託河上獨長謠

竹箭見送郭少府篇南楚江湘船大謂之舸無輜重
曰輕舸三國志黃蓋以輕舸十艘最著前是也木蘭

香木也今湖廣潯陽江中七里洲中有魯般刻木蘭為舟詩家云木蘭舟橈皆用此耳金隄見陳文林篇又漢武時河決金隄議者欲求九河故道而穿之則非蜀之金隄矣貝闕見郭少府篇論語識仲尼曰吾聞堯典舜等遊首山觀河渚有五老遊河一老曰河圖將來告帝期二老曰河圖將來告帝謀三老曰河圖將來告帝書四老曰河圖將來告帝圖五老曰飛為流星上入昴荷一名芙蓉渠一名芙蓉其莖為茹其葉為蓮其本為蓉其花為菡萏其實為蓮其根為藕其中為藕藕中為薏左思魏都賦丹竊凌波而的爍潘岳芙蓉賦丹輝拂紅飛須垂的斐披艷赫散煥燿燿燿吳才老解為指的楊升菴曰非也的紅也史記五王世家程姬有所避註玄的點絳言有月事以丹註面的上的林賦的爍江靡宋玉神女賦朱脣的其若丹又謂馬之的額的盧烏脰亦曰的汝南陳耀文辨

之謂不宜以馬額爲脰爲的愚謂的非以色亦非以
額以脰乃如射之的耳繁欽賦點元的之熒熒北堂
書抄娥黃星的宮詞有龍的王絮神女賦拖華的又
七山賦神簀巖巖而獨立仙的皎皎而孤臨孰知歲
之豐儉覩元白而皆諶可見的非定色矣荷花中心
如射侯之紅心故曰的即韵也千字文渠荷的歷與
的樂同夏荷則的樂樂然晚則疎矣梗泛見浮查篇
史記老子曰君子得其時則駕不得其時則蓬累而
行註蓬狀若鰻蒿細葉蔓生于沙漠中風吹則根斷
隨風轉移漢書明帝詔飛蓬隨風微子所歎李白詩
註蓬花如毬遇風則轉此與前註少異詩伯兮自伯
之東首如飛蓬註蓬如柳絮聚而飛如亂髮也曹子
建詩轉蓬離本根飄飄隨長風潘岳西征賦陋吾人
之拘擘飄萍浮而蓬轉仙查見高四篇河上長謠疑
用屈原事見之問篇江潭註趙至與嵇蕃書梁生適
越登岳長謠劉琨答盧湛詩何以贈子竭心公朝何

以叙懷引領長
謠註短歌曰謠

晚泊蒲類

蒲類匈奴地名西河舊事曰白山之中有好木
匈奴謂之天山去蒲類海百里漢章帝詔班超
有擊石池破白山臨蒲類取車師按一統志蒲
類即車師后王地治務塗谷晉時屬高昌貞觀
中平高昌以其地置應州領金滿蒲類輪臺三
縣后俱陷吐蕃其地有回鶻雜居故亦云回鶻
宋建隆中來貢元號畏兀兒地置達魯花赤今
名火州土魯蕃亦交河地也詳見詩中二庭註

二庭歸望斷萬里客心愁山路猶南屬河源自北流晚
風連朔氣新月照邊秋竈火通軍壁烽烟上戍樓龍庭

但苦戰燕頷會封侯莫作蘭山下空令漢國羞

沙鉢羅可汗建庭于堆合水謂之南庭吐陸可汗建
牙于啖曷山謂之北庭二庭以伊列水為界所謂南
單于北單于也蒲類即車師后王治地其前王治交
河城即唐交河縣去長安八千一百里漢元時置戊
己校尉屯田以其地勢高敞故名高昌壘有八城晉
時前凉張駿于交河縣置高昌郡后魏初有闕伯周
者始為高昌王其后麴嘉稱王于此自后魏至隋皆
入貢唐貞觀中平高昌以其地置西州及都督府開
元中改金山都督府天寶初改州為交河郡郡領高昌
交河柳中蒲昌天山五縣長安初置北庭都護府后
與蒲類俱陷于吐蕃云云餘見本題註此云二庭者
指車師前后王治地也故又曰萬里黃河源至元人
始知發源火敦腦兒之地華言星宿海也舊言河出
崑崙皆張騫之妄耳北流詳見下篇題註匈奴冒頓

單于子稽粥號老上單于每歲五月大會龍庭祭其先祖大地鬼神后漢書焚老上之龍庭即此也班超字仲升安陵人父彪兄固少有大志不修小節家貧為官傭書勞苦投筆歎曰大丈夫當立功異域取封侯安能久事筆硯乎有相者謂之曰生燕頰虎頭飛而食肉萬里封侯相也后歷事明章出征西域安集五十餘國封定遠侯李陵請於漢武曰臣所將皆荆楚勇士奇材劍客也力扼虎射命中願得自當一隊到蘭于山南以分單于兵毋令專鄉戴師軍上壯而許之后朱至鞬汗山兵敗降虜

晚渡黃河

黃河出吐蕃朶思甘之南星宿海元世祖命篤實西窮河源始知其出於此地近百泓匯而為澤登高望之若星宿然在中國西南直四川馬湖府之正西三千餘里雲南麗江府之西北一千五百里

自西而東合諸河水其流漸大行二十日至大雪山即崑崙也繞崑崙西南折而東而北而西又繞崑崙之北又轉而東北行二十餘日歷雲中九原至大寧始入中國道崑崙山名地首上為權勢星一曲也東流千里至規共山地名地契上為距樓星二曲也邠南千里至積石山名地肩上為別符星三曲也邠南千里入隴首抵龍門名地根上為營室星四曲也南流千里至卷重山名地咽上為卷舌星五曲也東流貫砥柱觸於流山名地喉上為樞星以運七政六曲也西距卷重山千里東至維會名地神上為紀星七曲也東流至大任地名地肱上為輔星八曲也東流過絳水千里至大陸名地腹上為虛星九曲也元學士潘昂霄志黃河九折胡地二折蓋乞兒馬出反必赤里也以禹貢參考絳象河圖及河源志一一皆合聞之楊升菴云

千里尋歸路一葦亂平源通波連馬頰迸水急龍門照
日榮光渾驚風瑞浪翻棹唱臨風斷樵歌入聽喧岸迥
秋霞落潭深夕霧繁誰堪逝川上日暮他鄉魂

詩街風河廣篇誰謂河廣一葦杭之大雅公劉篇涉
渭為亂註亂舟之截流橫渡者也馬頰九河之一在
商河縣境禹貢導河積石至于龍門南至于華陰東
至于砥柱又東至于孟津東過洛汭至于大伾北過
洛水至於大陸又北播為九河同為逆河入于海註
龍門山在馮翊夏陽縣西河之水所出禹所鑿也水
急如箭三秦記龍門水懸船而行兩旁有山龜魚俱
集其下上則為龍不能者點額而還尚書中侯曰堯
即政七十載修壇河洛仲月辛日昧明禮備榮光幕
河休氣四塞榮與紫同義見毛司馬篇紫河註逝川

見陳文林篇王粲詩方舟遡大江日暮愁我心
齊虞羲送友人詩共盈一樽酒對之愁日暮

早發淮口望盱眙

淮水見遊兗部題註盱眙戰國楚始為縣西晉
為臨淮郡以北臨淮水也東晉立盱眙郡唐改
西楚州宋陞盱眙軍尋改招
信軍今為盱眙縣屬泗州

養蒙分四瀆習坎奠三荆徙帝留餘地封王表舊城岸
昏涵蜃氣潮浦應雞聲洲迥連沙靜川虛積溜明一朝
從奉檄千里倦懸旌背流桐栢遠逗浦木蘭輕小山迷
隱路大塊切勞生唯有貞心在獨映寒潭清

欽定四庫全書

卷二

易山水蒙卦象曰蒙以養正聖功也禮四瀆視諸侯
白虎通曰中國獨發源而注海其功著大故稱曰瀆
史記殷湯作江誥曰古禹皋陶久勞于外民乃安東
為江北為濟南為淮西為河四瀆已修萬民乃居劉
向說苑四瀆能蕩滌垢濁馬能通百川於海馬能蕩
出雲雨馬為德甚美故視諸侯也易坎卦象曰水洊
至習坎君子以常德行習教事習重也上水下水故
曰習坎三荆有二北荆州河南伊縣東荆州唐州南
荆州鄧州此通典西魏三荆也後周宇文泰以楊忠
都督三荆孟康曰三荆即三楚也舊名江陵為南楚
吳為東楚彭城為西楚史記范增勸項梁立楚后求
得楚懷王孫心于民間為人牧羊立以為楚懷王都
盱眙項梁敗死徙都彭城即今徐州也后項羽陽尊
懷王為義帝又徙之江南都郴即今郴州封王指漢
高封韓信于淮陰也蜃氣見高四及之間篇臨海異
物志石雞清響以應潮慧驅輕逝以遠繫今江濱有

水漲雞潮至則鳴李德裕所謂三更津吏報潮雞是也山泉曰溜一作雷枚乘奏吳王書太山之雷穿石奉檄見高四篇戰國策楚威王謂蘇秦曰寡人心搖搖然如懸旌而無所薄左太冲詩羈旅無定心翩翩如懸旌桐柏山名淮水所出木蘭見泊河曲篇淮南王安好賓客所招置賓客作招隱詩有大山小山如詩之大雅小雅南齊何遜兄何求何點並棲遁世號點為大山猶為小山亦曰東山兄弟發迹雖異克終皆隱世謂何氏三高
大塊勞生見螢火篇

遠使海曲春夜多懷

海曲漢之縣名屬瑯琊郡舊設鹽官名日照鎮魏晉以來俱屬莒縣金始置日照縣屬莒州元仍舊今改屬青州府

長嘯三秋晚端居百慮盈未安蝴蝶夢遽切魯禽情別
島連環海離魂斷戍城流星疑伴使行月似依營懷祿
寧期達牽時匪狗名艱虞行已遠時迹自相驚

長嘯見韋明府篇端居見司馬樓胡蝶夢見酬思玄
上人篇莊子昔者海鳥止于魯郊魯侯御而觴之于
廟奏九韶以為樂具大牢以為膳鳥乃眩視憂悲不
敢食一嚮不敢飲一杯三日而死此以已養養鳥也
非以鳥養也東方朔十洲記環海之中有十洲焉祖
洲瀛洲長洲生洲鳳麟洲東海之洲也炎洲流洲南
海之洲也玄洲元洲北海之洲也聚窟洲西海之洲
也皆仙人所居之地漢和帝分遣使者二人各至州
郡觀採風謠二人當到益部投館吏李邵舍邵曰二
君發京時知朝廷遣二使入蜀不二人問何以知之

邵曰前有二使星向益州分野淮南子曰月天之使也匈奴舉事常隨月盛壯以攻戰月虧則退兵鮑明遠詩繡纈結飛霞璇題納行月三國孫權聞曹操來築營于濡須塢以拒之狀為偃月號偃月營

晚泊江鎮

四運移陰律三翼泛陽侯荷香銷晚夏菊氣入新秋夜
烏喧粉堞宿鴈下蘆洲海霧籠邊徼江風繞戍樓轉蓬
驚別渚逃名謝蟻邱還嗟帝鄉遠空望白雲浮

黃帝命伶倫取嶰谷之竹擇其竅厚均者截以為律以節五音之上下黃鍾太簇姑洗蕤賓夷則無射為陽大呂夾鍾仲呂林鍾南呂應鍾為陰蓋隹鳳凰之鳴而為之者也楊升菴云取雄竹雌竹吹之今律書

及律歷志呂覽說苑晉書等志俱無雄竹雌竹之事
宋玉笛賦衡山之陽見奇篠異幹良工至此曰命陪
乘取其雄焉得其雌焉遂以為笛候氣之法先治一
室令地極平乃埋律管使齊入地則有淺深冬至陽
氣距地面九寸而止唯黃鍾一管先達故黃鍾為應
十二月則大呂應之黃鍾先已虛如人用針徹其經
渠氣已隨針而出地有疎密不無差忒故先以木案
隔之然後實土案上令堅均一其上以水平其槩然
後埋律其下為木所節氣自平也但在調其案上之
土耳移陰律移大呂之陰轉太簇之陽也梁孝王船
名詩天暝浮雲飛三翼自相追張協七命爾乃浮三
翼戲中沚顏延年詩萬軸亂行衛千翼泛雲浮越絕
書越為大翼中翼小翼船以戰註大翼廣一丈五尺
二寸長十大中翼廣一丈三尺五寸長五丈小翼廣
一大二尺長五丈陽侯見贈之問篇堞城女牆也漢
桓帝時童謡曰城上烏尾畢逋公為吏于為徒註城

上鳥處高獨食不與下共謂人主多聚歛也鮑明遠
詩昨夜宿南陵今旦入蘆洲此蘆洲地名也離樊口
二十里今言蘆洲只泛言鴈欲含蘆耳邊微見蕩子
篇轉蓬見河曲篇飄蓬註莊子則陽篇孔子之楚舍
于蟻邱之漿其鄰有夫妻臣妾登極者子路曰是稷
稷何為者耶仲尼曰是聖人僕也是自埋于民自藏
于畔其聲銷其志無窮其口雖言其心未嘗言方與
世違而心不屑與之俱是陸沈者也是其市南宜僚
即子路請往召之孔子曰已矣彼知丘之著于己也
知丘之適楚也以丘為必使楚王之召已也彼且以
立為佞人也夫若然者其于佞人也羞聞其言而况
親見其身乎而何以為存于路往視之其室虛矣帝
鄉白雲見贈

高四篇序註

早發諸暨

諸暨在今紹興府城南一百二十里本越王允常所都地秦置諸暨縣屬會稽郡漢以后皆因之隋唐皆屬越州宋析置義安縣后復省入諸暨元陞諸暨州本朝初為諸全州尋改諸暨縣編戶一百七十五里

征夫懷遠路夙駕上危巒薄烟橫絕巘輕凍澁迴湍野霧連空暗山風入曙寒帝城臨霸涖禹穴枕江干橘性行應化蓬心去不安獨掩窮途淚長歌行路難

山之美者曰巒猶肉之美者曰膾也巘見梁大官篇秦記霸水古滋水也出雍州藍田谷北入渭正義曰即秦嶺水之下流秦繆公築宮于此更名城曰霸城水曰霸水以章霸功詩在水之涖註水涯也禹穴見

靈泉頌干亦水涯也詩小雅斯干篇秩秩斯干楚詞
后皇嘉樹橘徠服兮受命不遷生南國兮註屈原自
比志節如橘不可移徙蓋橘逾淮而北則為枳也莊
子逍遙遊篇莊子謂惠子曰子有五石之匏何不慮
以為大樽而浮乎江湖而憂其瓠落無所容則夫子
猶有蓬之心也夫註蓬非直達者也晉書阮籍嘗率
意獨駕不由逕中車轍所窮輒慟哭而返行路難古
曲名晉書山嵇少有才名博學有文章著后漢書百
篇嵇情秀遠善音樂舊歌有行路難曲辭頗疎實山
嵇好之乃文其詞句婉其節制每因酣醉縱歌之聽
者莫不流涕霸水在今陝西西安府城東二十里
源出秦嶺合藍谷傾谷諸水入漣水北注于渭

晚憩田家

轉蓬勞遠役披辟下田家山形類九折江勢急三巴懸

梁接斷岸澁路擁崩杳霧巖輪曉魄風駛漲寒沙心跡
一朝舛江山萬里賒龍章徒表越閩俗本非華旅行悲
泛梗離贈斷疎麻唯有寒潭樹獨似故園花

轉蓬見泊河曲篇披薛見高四篇九折見費六篇三
巴記閬白二水東南流曲折如巴字故曰三巴劉璋
為益州分墊江以上為巴西治閬中今保寧府是以
下至臨江為永寧治江州號中巴今重慶府是胸臆
縣至魚復為巴東治永安今夔州府是巴道分矣故
巴郡號為三巴魄月也見崔駰馬篇駛馬行疾也風
急亦曰駛宏明集榮辱迅避石光古今駛過拍掬梁
簡文詩鶯啼春欲駛無為空拚靡漲寒沙風起沙飛
如水漲也梁邱遲詩森森荒樹齊折折寒沙漲中說
魏微曰聖人有憂乎子曰天下皆憂吾獨得不憂問

疑子曰天下皆疑吾獨得不疑徵退子謂董常曰樂
天知命吾何憂窮理盡性吾何疑常曰子亦二言乎
曰徵所問者迹也吾告汝者心也心迹之別久矣賒
有餘也莊子龍哀章甫携以適越無所用之晉趙景
真與稽康書表龍章于裸壤奏韶武于輦俗閩東越
別名春秋七閩地戰國越人所居故稱閩越秦立閩
中郡及漢興師越人佐漢有功復立無諸為閩越王
王閩中故地郡治今建寧之建安福州之侯官皆其
地也治地名漢錫光在交趾教民夷以禮義任延守
九真教民耕種嫁娶故嶺南華風始于二守此言閩
俗非華用此意也泛梗見
浮查序疎麻見高四篇

宿仙庄

金陵一超忽玉燭幾環周露積吳臺草風入郢門楸林

虛宿斷霧磴險挂懸流拾青非漢策緇化類秦裘牽跡
猶多蹇勞生未寡尤獨此他鄉夢空山明月秋

金陵見秋夜送閻五詩序后漢書西域傳玉燭和氣
梁湘東王繹曰太平玉燭註四時調和謂之玉燭露
積吳臺草見久客臨海篇郢楚都也潘岳懷舊賦岩
岩雙表列列行楸註表華表堯設誹謗之木即此古
人亦樹之墓也爾雅櫟大而散楸郭璞曰老乃皮散
皆為楸也劉向曰楸木名楚詞懷感多用楸字宋玉
九辨露既下降百草兮奄離披此梧楸故云郢門楸
也謝靈運詩銅陵映碧澗石磴瀉紅泉孫興公天台
賦跨穹隆之懸磴註磴石橋也木元虛海賦淵客築
室于岩底蛟人構館于懸流拾青見高四篇緇化秦
裘俱見途中有懷
篇勞生見螢火賦

過張平子墓

漢張衡字平子南陽西鄆人少善屬文通五經
貫六藝尤思致于天文陰陽歷算安帝徵拜郎
中再遷大史令和初為河間相連侍中以銅
製渾天儀實以清水以玉蛇吐漏石為夜漏左
為晝漏又有西京賦東京賦永和四年卒令舊
西鄆城南有平子墓及崔瑗所作碑文斷石僅
存西鄆漢縣名屬南陽郡晉因之今
南陽府府城北五十里有西鄆城

西鄆該通理南陽擅德音玉卮浮藻麗銅渾積思深忽
懷今日昔非復昔時今日往豐碑閣風來古木吟唯歎
窮泉下終鬱羨魚心

西鄂見本題註范曄贊三才理通人靈多蔽近惟形
算遠抽深滯不有元慮孰能昭晰南陽本申伯國戰
國為韓宛邑秦為宛縣南陽郡治漢因之后魏改上
陌縣后周改上宛縣隋初改南陽縣屬鄧州唐初於
縣置宛州尋罷州獨以縣屬鄧州唐末以南城縣省
入五代及宋皆因之金為申州治所元改南陽府仍
置縣今因之平子墓在縣界東北石橋保玉巵浮藻
指其善為文也江淹恨賦藻思綺合情麗羊眠又瓊
敷玉藻銅渾見本題註禮記檀弓下公室視豐碑註
豐大也閭如閭岸之閭謝靈運祭古塚文窮象為塹
聚壤成基漢成帝時客有薦楊雄文似相如者雄以
臨川羨魚不如退而結網會上自西嶽還上河東賦
以勸平子歸田賦遊都邑以永久無明畧
以佐時徒臨川以羨魚俟河清乎未期畧

海曲書情

海曲見遠使
海曲題註

薄遊倦千里勞生負伯年未能查上漢詎肯劒遊燕白
雲照春海青山橫曙天江濤讓雙壁渭水擲三錢坐惜
風光滿長歌獨塊然

梁裴子野劉虬碑曰及其長也奉檄動容薄遊下邑
劉孝綽詩方歡厚德重誰言薄遊倦陸機狹斜行余
本倦遊客勞生見螢火賦查上漢見高四篇荆軻好
擊劒遊衛元君不用過榆次與蓋聶論劒聶怒而目
之去遊邯鄲與魯勾踐爭博勾踐怒而叱之默逃去
遊燕讓望見之問篇安陵項仲山有清操每飲馬輒
投三錢于水中曹植上魏文書每四節之會塊然獨
處應休肆與曹長思書塊然獨處有離羣之志又與

從弟來還京
都塊然獨處

邊城落日

紫塞流沙北黃圖霸水東一朝辭俎豆萬里逐沙蓬
月恒持滿尋源異鑿空野昏邊氣合峯迫戍烟通
奮力風塵倦疆場歲月窮河流控積石山路遠崆峒
壯志凌蒼兕精誠貫白虹君恩如可報龍劍有雌雄

紫塞地名以其色言之流沙見度天山篇黃圖見崔
駘馬篇霸水見諸暨篇沙蓬見泊河曲篇候月見遠
使海曲篇史記白登之圍高帝令士皆持滿傳矢外
鄉從解角直出竟與大軍合文獻通考突厥候月將

滿輒為冠鈔史記使張騫使西域尋河源然騫亦鑿
空註杜撰也如云河出崑崙皆妄說耳禹貢浮于積
石至于龍門又導河積石註積石在金城郡河關縣
西南羌中詳見晚渡黃河篇列于黃帝與廣成子居
崆峒之上註崆峒在醴泉郡漢武祠五時于雍遂踰
隴西登崆峒出蕭關從數萬騎獵新秦中勒邊兵而
歸在今薊州城東北五里一名翁同上有府君廟楚
詞招魂篇與王趨夢兮相后先君王親發兮憚青兕
此借從君田獵之事而言為王禦侮也史記師尚父
左仗黃鉞左秉白旄以誓曰青兕青兕總爾衆庶與
爾舟楫后至者斬註王充云蒼兕水獸九頭稱其武
勇之詞也古今原始云武王發商至孟津命蒼兕具
舟楫人名也殊謬貫白虹見螢火賦一
變成虹註龍劍雌雄見螢火埋豐註

蓬萊鎮

蓬萊古斟尋國唐虞時嵎夷地春秋時為牟子
國戰國屬齊秦為齊郡地漢屬東都后魏析東
萊郡地置東牟郡北齊省入長廣郡隋初廢郡
置牟州大業初州廢唐復置牟州治牟平又置
登州治文登貞觀間二州俱廢如意初復置登
州于牟平縣神龍間徙治蓬萊縣天寶初改州
于東牟郡乾元初復為登州屬河南宋屬京都
路金屬山東路元初屬益都路后屬般陽路中
本朝初屬萊州府洪武九年陞登州府蓬萊縣
附郭即蓬萊鎮也武帝于此望海中蓬萊山築
城以為名貞觀間
置鎮故曰蓬萊鎮

旅客春心斷邊城夜望高野樓疑海氣白鷺似江濤結
綬披三入承冠泣二毛將飛憐弱羽欲濟之輕舳賴有

陽春曲窮愁且代勞

海氣即蜃也見之問篇鷺濤見高四篇結綬見梁大
官篇應場詩三八承明廬言三次為翰林官也禮古
之為師者不斬祀不殺厲不擒二毛註毛二色也又
見上裴侍郎篇舳舻見晚泊河曲篇陽春曲見之問篇
史記虞卿屏相印間行去趙困于齊梁已死不得意
乃著書上採春秋下觀近世曰節義稱號揣摩政謀
凡八篇曰虞氏春秋太史公曰虞卿非窮愁不能
著書以自見於后世云虞卿事見螢火賦綈袍註

宿溫城望軍營

溫古邑名周為蘇忿生封邑東周為畿內邑漢
為溫縣屬河內郡后廢隋復置屬懷州唐初置
平州尋復為縣屬懷州改屬洛州后又屬孟州
宋金元仍舊國朝因之屬懷慶府按一統志寧

國府城東一千里有溫城云唐刺史溫璋所築然溫城若在此則非邊地矣據詩中所云前註

近是

虜地寒膠折邊城夜折聞兵符關帝闕天策動將軍戎
靜胡笳徹沙明楚練分風旗翻翼影霜劍轉龍文白羽
搖如月青山斷若雲烟疎疑卷被塵滅似銷氛投筆懷
班業臨戎想霍勲還應雪漢耻持此報明君

晁錯兵事書匈奴欲立威始於折膠註秋氣至膠動
可折弓弩可用匈奴常以為候而出軍史記侯生謂
公子無忌曰吾聞晉鄙兵符在王卧內註符信也輔
也所以輔信古者以竹為之后世以竹易得於是以

銅鐵金銀為物象用之故侯生曰得虎符奪鄙兵是也漢文與郡國為銅虎符竹使符應劭曰銅虎符長六寸第一至五國家發兵遣使至郡合符符合乃聽受之竹使符以竹箭五枝長五寸旁鐫篆書亦一至五出入徵發用之張晏曰符以代古之珪璋從簡易也顏師古曰與郡國為符各分一半右留京師左以與之此漢制也唐高祖入長安罷竹使符班銀莛符其后改為銅魚木契朝廷徵發下敕書契魚都督郡府叅驗皆合然後遣之大策策書從天子出也唐有大策上將唐太宗嘗為之胡笳見蕩子篇謝元暉詩澄江靜如練旗有烏隼之象故言翼影劍為龍文見螢火埋豐註說苑孔子北遊農山子路曰願得白羽若月赤羽若日鐘鼓之音上聞乎天旌旗翩翩下蟠于地由且舉兵而擊之投筆見泊蒲類篇霍去病衛青姊子霍光兄也為漢武驃騎將軍伐匈奴屢立奇功封狼居胥禪姑衍臨瀚海益封五千八百戶漢武

欲伐胡下詔曰昔齊襄復九世之讐春秋大之高帝
遣朕平城之憂高后時單于為書詞極褻嫚唐太宗

滅突厥立石曰
雪耻酬百王

和孫長史秋日臥病

霍第疎天府潘園近帝臺調絃三婦至置驛五侯來尚
想歡娛合吁嗟歲月摧金壇分上將玉帳引瓌才決勝
鯨波靜騰謀鳥谷開白雲淮水外紫陌霸陵隈節變驚
衰柳笳繁思落梅調神和玉燭揆藻握珠胎悵矣欣懷
土居然欲死灰還自承雅曲暫喜躍沈鯢

漢宣帝賜霍光甲第一區光薨夫人顯改先塋制廣
治第遊戲于中子禹兄孫山並治宅疎廣也周禮鄉
老及鄉大夫羣吏獻賢能之書于王王再拜受之登
于天府史記張良曰關中金城千里天府之國潘岳
閒居賦大夫人乃御板輿升輕軒遠覽王畿近周家
園體以行和樂以勞宣常膳載加舊疴有瘥山海經
鐘鼓之山帝臺之所以觴百神也郭璞註舉觴燕會
則于此山今按其山在伊闕西南調絃三婦見春齊
早行篇寶瑟調中婦註鄭當時字莊孝景時為太子
舍人每五日洗沐嘗置驛馬長安諸郊存問諸故人
請謝賓客夜以繼日漢成帝母舅王譚王立王根王
逢王商同日封侯門客各有所厚不得左右不相往
來惟齊人樓護字君卿傳會五侯咸媚事之各得其
歡心結納士夫尤見親敬與谷永俱為五侯上客母
喪致車三千輛里巷歌之曰五侯治喪樓君卿漢高
築壇拜韓信為大將故後言拜將者曰金壇之拜今

泗洲東七里有壇基存焉俗說也壇在蜀中軍行之制其隱奧深居白帳密謀秘議臨之所謂玉帳虎帳也瓌美也鯨海中大魚故謂海曰鯨海之波鳥谷猶言鳥道險不通人惟鳥度耳白雲用思親意見高四篇紫陌見毛司馬篇霸陵見別李嶠篇曲水曰隈古樂府有落梅花曲其詞云念爾零落逐風颺徒有霜花無霜實玉燭見宿仙庄篇揆藻作文也漢郊祀歌長麗前扶光耀明註揆舒也選也謝宣遠答謝靈運書牽率酬嘉藻蜀都賦幽思綯道德摘藻揆天庭珠胎見高四篇居然猶徒然也詩生民篇居然生子死灰見螢火篇雅詩之小雅大雅謂正樂之歌也

四月八日題七級

化城分鳥堞香閣俯龍川
複棟侵黃道重簷駕紫烟
銘

書非晉代壁畫是梁年霸畧今何在王宮尚歸然二帝
曾遊聖三鄉是偶賢昔茲遊勝侶超彼託良緣我出有
為界君登非想天悠悠青曠裏蕩蕩白雲前今日經行
處曲音號蓋烟

蓮華經云朽宅通入大之文軌化城引昔緣之不隊
又云辟如五百由旬險難惡道衆欲過此至珍寶處
怖畏前途猶遠欲還有一導師于險道中過三百由
旬化作一城告衆人言汝等勿退今此大城可于中
止導師見衆人少息復滅化城語衆人去來寶處在
近向來大城我所化作故佛寺又名化城禽經離上
無尋鷲嶺上無常雉上有大鷄上有赤脚故計文曰
雉城女墻曰雉堞曰鳥堞又曰鳥堞則見泊江鎮篇

漢武起栢梁臺在長安城北用香栢為殿梁香聞十里龍川以其下有水而加以美名也又蓬華經大海安竭羅龍宮自然涌出或以此名龍川耳復重也所謂複廟重簷也黃道日所行之道見秋雲詩南陸註侵之言其高也架紫烟亦高意晉王羲之善書一時寺塔碑銘皆其所書梁武于同泰寺建佛樓高二十三大以七寶飾畫名七寶樓歸然猶巍然也晉五代之后如魏梁姚興笮融皆起佛殿故云伯畧已住王宮尚存也二帝必指唐之先帝曾遊于此孔融深敬鄭元徒履造門告高密縣為元特立一鄉曰昔齊置士鄉越有君子鄉皆異賢之意也鄭君好學寶懷明德昔太史公廷尉吳公謁者鄭公皆漢名臣又四皓亦稱公則公者仁德之正號不必三事大夫也今鄭公鄉宜曰鄭公鄉門曰通德門同遊之美者曰勝侶佛經出煩惱之深源登菩提之彼岸王簡栖頭陀寺碑則稱謂所絕形乎彼岸矣涅槃經心無退轉即便

前進已得到彼岸登大高山離諸恐怖多受安樂彼岸山者喻于如來受安樂者喻于常性大高山者喻大涅槃也生緣業空則緣廢維摩經如影從身業緣生見僧肇曰身衆緣所成緣合則起緣散則離金光明經曰所謂無明緣行行緣識識緣名名緣色色緣六入六入緣觸觸緣愛愛緣取取緣有有緣生生緣老死憂悲苦惱滅裂緣文選五臣註棲遲六十者謂一三千界下至河毗地獄上非想天為一世界千三世界為小千世界大千世界為大千世界至千中世界為大千世界大乘經曰若胎生若卵生若濕生若化生若有色若無色若有想若無想若非有想若非無想我皆令人無餘涅槃而滅度之如斯了悟便能脫死超生青曠天也白雲見高四篇蓋烟猶凌烟也

早秋出塞寄東臺詳政學士

東臺詳政唐官
名見宋之問篇

促駕逾三水長驅望五原
天街分斗極地理接樓煩
漢月明關隴胡雲聚塞垣
山川殊物候風壤異涼溫
戍古秋塵冷沙寒宿霧繁
昔余迷學步投跡忝詞源
蘭室薰延閣蓬山欵禁園
影纓陪綬冕載筆偶璵璠
汲冢寧詳蠹秦牢距辨寬
一朝從篚服千里駕輕軒
鄉夢隨魂斷邊聲入聽喧
南圖終斂翮北上據摧轅
弔影慚連茹浮生倦觸藩
數奇何以託桃李自無言

三水地名今陝西西安府淳化縣西有廢三水縣五
原本秦九原更名五原在今榆林縣西界四十里桓
譚新論天卯酉當北斗極北斗極天樞地軸也猶蓋
有葆斗矣史記趙武靈王曰吾國東有齊中山北有
燕東胡西有樓煩在今太原府奇嵐州莊子秋風篇
子獨不聞壽陵餘子之學行于邯鄲與未得國能又
失其故行矣直匍匐而歸耳一作學步家語孔子曰
與善人居如入芝蘭之室久而不聞其香則與之俱
化左思蜀都賦結陽城之延閣飛觀榭乎雲中註延
長也左右長廊有窓者曰延閣東漢時學者稱東觀
為老氏藏室道家蓬萊山蓬萊山者海中神仙府幽
惟秘錄並皆在焉鮑明遠詩京城十二衢飛甍各鱗
次士子影華纓遊客疎輕轡影長組貌梁孝標作影
組孔子曰美哉璫璣遠而望之煥若也近而視之瑟
若也一則理勝一則乎勝禮記曲禮史載筆言其紀
載同寶玉之美也晉武帝時汲郡人不準盜發魏襄

王墓或言安釐王冢得竹書數十車其紀年十三篇書中與經傳大異者云夏年多殷益于啟位啟殺之太甲殺伊尹文王殺季歷自周受命至穆王百年非穆王壽百歲幽王亡共伯和者攝行天子事其書多爐簡斷札晉武乃詔束皙釋之蠹食書虫也秦牢見螢火寃獄註篚服用篚厥元黃意南圖見高四篇翻翼勁羽也推轅見春霽早行篇大行道註弔影見螢火篇易泰初九拔茅茹以其彙征吉本義三陽在下相連而進拔茅連茹之象征行之吉也莊子刻意篇其生若浮其死若休觸籬見酬思元上人詩李廣傳衛青陰受上誠以廣老數奇毋令當單于廣周自辭于青願居前青不聽廣不謝而去意甚愠竟失道後期青使長史問狀急責廣之幕府對簿廣自殺一軍皆哭百姓皆為流涕數奇謂不遇單于為對敵也如淳曰數敗也下文云失道恐是奇偶之義桃李見蕩子篇桃李蹊註

五原漢郡名治九原縣隋廢置豐州后改五原郡唐初復為豐州又為九原郡寰宇記九原有前後雞延城及即君城今省之故城在延安府神木縣

鄭安陽入蜀

已見送費六題註春秋時蜀侯所治為秦惠所滅置蜀郡漢改益州晉改成都國取三年成都之義唐改成都府唐宋元因之本朝置四川省以成都府附

彭山折坂外井絡少城隈地是三巴俗人非百里才長途君悵望別路我徘徊心賞風烟隔容華歲月催遙遙分鳳野去去轉龍媒遺錦非前邑鳴琴

即舊臺劔門千仞起石路五丁開海客乘查渡仙
童馭竹迴魂將離鶴遠思逐斷猿哀唯有雙鳬鳥
飛去復飛來

彭山在眉州彭山縣東十里彭祖家于此名彭亡山
岑彭伐蜀營此問地名欲徙營會日暮是夜為刺客
所害后改平無今改平模山折坂見費六篇井絡見
之問篇蜀都賦亞以少城接乎其西註張儀既築城
都大城後一年又築少城唯西南三壁東即左城西
壙容齊遁筆蜀刺史埋大城大守理少城三巴見晚
憩田家篇百里才見高四篇展駁註楚詞獨不見鸞
鳳之高翔大皇之野循四極而周迴見盛德而后下
蜀亦有地名鳳野漢武天馬歌天馬來從西極涉流
沙九夷服天馬來歷燕草徑千里來東道天馬來龍

之媒遊閭閻觀玉臺晉劉牢之有馬名龍媒跳五丈
澗以免慕容垂之迫問憲令綿竹以禮讓化人縣民
杜成夜行得遺賄一囊有錦二十疋求其主還之曰
縣有明君何敢負也子賤為單父宰不下堂鳴琴而
治故稱縣治曰琴堂然蜀有司馬相如琴臺蓋借以
用于賤之事也琴臺見任處士篇一統志小劔在保
寧府劔州北十五里與大劔山相屬五丁所開也大
劔雖號天險然頗夷小劔則鑿石架閣有不容越寒
宇記大劔山至此有隘東之路故曰劔門秦惠王欲
伐蜀道不通聞蜀有五丁壯士乃作鐵牛詐言曰糞
金三斗名金牛蜀王貪使五丁開山取之遂成大道
取牛至知其詐然道已成矣五丁死遂使張儀滅蜀
蜀王本紀又言惠王獻女五人蜀王遣五丁迎之至
梓潼見大蛇入山穴中一丁引其尾不出五丁共引
之山崩五女上山化為石蜀始通道乘查見高四篇
郭伋守南陽有兒童數十騎竹馬迎之伋與刻期往

返不違其約又費長房與騎竹杖事見出石門詩此
與琴臺皆雙意引用也商陵牧子娶妻五十無子父
母將為改娶妻聞之終夜倚戶而悲嘯牧子因作別
鶴操後人因有離鶴別鶴之曲斷猿不成羣也巴東
三峽猿長鳴至三聲聞者莫不垂淚物類志猿性急
腸狹聞類死聲鳴則腸俱斷而死春秋時膠東猿盛
踐人禾稼楚昭王使養由基射之遇于母猿中其子
死母長鳴三聲五里之外諸猿聞之俱死后漢王喬
河東人令葉縣每旦入朝帝訝其去來不見車騎使
伺之太史望其將至輒有雙鳧飛來令舉網張之得
雙履詔尚方視之則四年中所賜尚書官履也註旦
月朔也黃帝命於則作扉履草曰扉麻皮曰履履下
施木
曰舄

在軍中贈先還知己

蓬轉俱行役，瓜時獨未還。
魂迷金闕路，望斷玉門關。
獻凱多慚霍，論封幾謝班。
風塵催白首，歲月損紅顏。
落鴈低秋塞，驚鳬起暝彎。
胡霜如劒鏑，漢戶似刀鐮。
別後邊庭樹，相思幾度攀。

蓬轉見泊河曲篇。瓜時見度天山篇。謝朓出尚書省，
既通金闕之諸彥，什名云闕在門兩旁。中央闕然為
道也。上懸法象，其狀巍然高大，謂之象魏。周禮正月
始和布法象魏，如今人掛榜門樓是也。觀義亦同。莊
子讓王篇：身在江湖之上，居魏闕之下，是觀象魏。
闕一物三名也。太上決疑經：銀宮金闕列仙攸館。元
祖所居郊祀志：蓬萊方丈瀛州三神山在渤海中。金
銀為宮闕六帖：銀宮金闕紫府清都以仙居。擬帝座。

也又鳳閣見秋雲篇班超為西域校尉年老思歸上書曰臣不敢望酒泉願生入玉門關地理志玉門關在陝西行都司故瓜州西北一十八里韋昭曰玉門關在龍勒縣界敦煌縣西北又酒泉有玉門縣索隱曰光武閉玉關以謝西域罷關屯徙其人于此因以名縣關在縣西北一百二十里五代晉高居誨使于闐記自甘州西始涉磧五百里至肅州渡金河西百里出天門關又西百里出玉門關入吐蕃界西至沙州州南十里鳴沙山又東南十里三危山其西渡西鄉河曰陽關也出師有功而歸軍人歌舞謂之凱歌上功朝廷謂之獻凱凱樂也亦作愷周禮奏愷樂左傳晉文公愷以入于晉霍去病班超也

夏日憶張二

伏枕憂思深擁膝獨長吟烹鯉無尺素烹魚勞寸心疎

麻空有折芳桂湛無斟廣廷含夕氣閒宇澹虛陰織虫
垂夜砌驚烏棲暝林驩娛百年促羈病一生侵詎堪孤
月夜流水入鳴琴

烹鯉見送尹大詩荃魚疎麻俱見高四篇桂見陳文
林篇又見閭五官篇沈休文網虫垂戶織當是蜘蛛
之屬流水
見高四篇

和李明府

傳聞葉縣履飛向洛陽城馳道臨層掖津門對小平霞
殘疑製錦雲度似飄纓藻揆潘江徹塵虛范甑清詎憐

衝斗氣猶向匣中鳴

葉縣履見安陽篇雙鳧舄註洛陽城今河南府洛陽縣也賈山傳秦為馳道於天下東窮燕齊南極吳楚江湖之上濱海之觀畢至道廣五十步三丈而樹厚築其外隱以金堆樹以青松漢令諸侯有制得行馳道者行旁道無得行中央三大如今京師街道左右稍低惟中頗高馳道遺制也層重樓也門從旁出曰掖如人之腋下今左右掖門是也上有重樓故曰層掖漢宦官張讓跋珪劫帝辨陳留王與數十人步出戟門夜至小平津六壘不自隨公卿無從者子皮欲使尹何為邑子產曰少未知可否子皮曰吾愛之使夫往而學焉子產曰吾子愛人以政猶未能操力而使割也其傷實多子有美錦不使人學製焉大官大邑身所庇也而使學者製焉其為美錦不亦多乎易通卦驗冬至陽雲出箕如樹木立春青陽雲出房如

積水春分正陽雲出張如積白鵲谷雨大陽雲出參
如車蓋立夏常陽雲出背如赤珠夏至少陰雲出如
水波立秋濁陰雲出如赤繒寒露正陰雲出如冠纓
霜降太陰雲出上如羊下如磻石飄纓見東臺詳政
篇潘岳傳贊機文喻海潘藻如江范甌見春夜韋明
府篇衝斗鳴匣見螢火篇又顓頊有畫影騰空二劍
若四方有兵則飛指其方故戰則
克未用時在匣中常如龍虎吟

葉縣古應于國周為應鄉春秋楚遷許于葉即此後
為沈諸梁邑漢置葉縣晉屬南陽國北齊置襄州東
魏置定南郡后周廢襄州置南襄城郡又廢定南為
縣隋初郡廢以縣屬許州后以定南縣省入唐初置
葉州州罷仍以縣屬許州后析置仙鬼縣屬仙州尋
罷州省縣宋屬汝州金屬裕州元因之今屬南陽府
洛陽城周地名居洛水北故曰洛陽春秋屬晉戰國
屬魏秦屬三川郡漢為河南郡治東漢信讖去水改

雒陽魏復為洛陽晉因之隋遷都治河南縣唐改洛陽為永昌尋復舊宋初河南洛陽二縣並置金以河

南縣省入洛陽縣元仍舊今屬河南府

小平津即孟津也在洛陽城北都道所湊近代呼為武濟一曰富平津今名河陽津也

望月有所思

九秋涼風肅千里月華開圓光隨霧湛
影逐波來似霜明玉砌如鏡寫珠胎
曉色依關近邊聲雜吹哀離居
分照曜愁緒共徘徊自繞南飛羽空忝北堂才

八風立秋曰涼風月令仲秋之月涼風至白露降月華圓光見秋露篇又梁元帝江中月影詩風來如可

泛流急不成圓秦鉤斷復接和璧碎還聯遂波又用
漢書月穆穆以金波字珠胎見高四篇江淹儼休上
人詩西北秋風至楚客心悠哉日暮碧雲合佳人殊
未來露采方泛灩月華始徘徊寶書為君揜瑤琴詎
能開相思巫山緒悵望陽雲臺膏壚絕沈潔綺席生
浮埃桂水日千里因之平生懷北堂猶北門也唐制
學士謂之
北門應制

寓居洛濱對雪憶謝二

旅思眇難裁衝飈限易哀曠望洛川晚飄颻瑞雪來積
彩明書帳流韻繞琴臺色奪迎仙羽花避犯靈梅謝庭
賞芳逸袁扉掩未開高人儻有訪興盡詎須迴

王融離夜詩翻潮尚知恨客思眇難裁銜颺見螢火
篇曹子建洛川神賦髣髴兮若輕雲之蔽月飄飄兮
若流風之迴雪孫康家貧無油映雪讀書琴臺見鄭
安陽篇流韻用映雪彈琴事列仙傳周靈王太子晉
好吹笙作鳳鳴遊伊洛間道士浮邱公接上嵩山三
十餘年往來緱氏山其後見栢良曰告我家七月七
日待我緱氏山頭至期果乘白鶴駕車舉手謝時人
而去後人稱鶴駕本此按緱氏仙人巷王喬健為武
陽人為栢人令于此登仙非王子喬也又按綱目太
子晉卒分註記與師曠講論殊無登仙之事未知此
說何所自始大抵詩家用事多相襲成語不計有無
虛實但記其說可也此因洛濱用太子晉因雪用羽
安陸城東一百里有花山舊傳靈濟祖師過此百草
開花故名梅花如雪梅亦有代雪言者謝安因雪驟
降取酒賞之因曰白雪紛紛何所似兄子客兒曰撒
鹽空中差可擬兄女道韞曰未若柳絮隨風起安曰

柳絮才高不道鹽安兄奕也客兒名朗袁安傳大雪
丈餘洛陽令身出案行見民家皆除雪至安門無行
路謂安已死令人除雪入戶見安僵卧問何不出安
曰大雪人皆餓死不宜干人王子猷居山陰大雪夜
聞室命酌四望皎然因詠招隱詩忽憶戴安道時在
剡乘興棹舟經宿方至造門而返或問之對曰乘興
而來興盡而返何必見
戴安道耶安道達字也

西行別東臺詳政學士

意氣坐相親關河別故人客似秦川上歌從易水濱
荒行辨玉臺遠尚名輪洩井懷邊將尋源重漢臣上苑
梅花早御溝楊柳新只應持此曲別作邊城春

意氣見高四篇關河猶關山也秦川即霸水也易水
歌見高四篇辨玉用卞和事以足玉塞之意輪臺地
名在車師西北千里其東則渠犂也漢李廣利伐二
師以洩城中井井水盡竭尋源見泊蒲類篇楊柳梅
花雖因送別之境亦
曲名也故云持此曲

送吳七遊蜀

蜀見費

六題註

日觀分齊壤星橋抵蜀門桃花嘶別路竹葉瀉離尊夏
盡蘭猶茂秋深柳尚繁霧銷山望迥風高野聽喧勞歌
徒欲奏贈別竟無言唯有當秋月空照野人園

日觀見高四篇蜀有七星橋張儀所造李膺益州記
一曰長星二曰員星三曰機星四曰夷星五曰尾星
六曰冲星七曰曲星桃花竹葉俱見尹大篇勞歌贈
別俱見之間篇陳張正別王應令詩青雀離帆遠朱
薦別路遙維有當
秋月夜夜上河橋

春晚從李長史遊開道林故山

幽尋極幽壑春望陟春臺雲光棲斷樹霞影入仙杯古
藤依谷上野徑約山隈落蕊翻風去流鶯滿樹來興闌
荀御動歸路起浮埃

漢書谷永曰遙興輕舉登霞倒景陸機前後聲歌獻
酬既已周輕舉乘紫霞註言衆仙會集乘霞而去荀

奏見李膺因為之御喜
曰今日乃得御李君矣

和王記室從趙王春日遊陀山寺

鳥輿陪訪道驚嶺治棲真四禪明靜業三空廣勝因祥
河疎疊澗慧日皎重輪葉閣龍宮密花明鹿苑春雕談
荃奧旨妙辨激元津雅曲終難和徒自奏巴人

鳥輿曰輿訪道指趙王也驚嶺見序文遺事註棲真
謂真人所棲也沈休文鍾山詩八解鳴澗流四禪隱
岩曲註大品經云初禪二禪三禪四禪隱此山岩之
曲八解地名禪以靜為主故曰靜業智度經混絜有
三門一曰空門二曰無相門三曰無作門謂觀諸法
無我無作者受者是三空之名故號空門大乘經曰

欲知過去因今生受者是欲知未來因今生作者是
勝如勝國之勝過去之因也王簡栖頭陀寺碑祥河
輟水竇樹低枝瑞應經曰時連河水流甚疾佛以自
然神通斷水涌起高出人頭令底揚塵佛在其中又
曰佛后日入指地池澡浴畢欲出無所攀池上有樹
曲枝下就佛牽而出頭陀寺碑又云澄法雲于真際
則火宅晨涼曜慧日于康衢則重昏夜曉華嚴經慧
日大聖尊久乃說是法劉蚪註善薩員淨照均明兩
故曰慧日又北史李士謙善論元理有客問三教優
劣荅曰佛日也道月也儒五星也六帖山重高海重
潤日重光月重輪龍宮見序文遺事註紫陽真人周
義山遇羨門子乘白鹿佩青髦之節又十洲記苑囿
之中白鹿白鶴皆在焉史記齊人頌曰談天衍雕龍
典矣較過髡劉向別錄鄒衍之所言五德終始天地
廣大故曰談天騶奭修衍之文若雕鏤龍文故曰雕
龍過作輶車盛膏器也矣之而膏愈澤辨口捷給似

之巴人見

高四篇

冬日野望

故人無與晤安步陟山椒野靜連雲卷川明斷霧銷靈
巖聞曉籟洞浦漲秋潮三江歸望斷千里故鄉遙勞歌
徒自奏客魂為誰招

晤遇也詩國風東門之池篇彼美淑姬可與晤言
漢武悼李夫人賦釋興馬子山椒兮奄終夜之不陽
註山椒山陵也莊子齊物論篇南郭子綦謂顏成子
遊曰女聞人籟而未聞地籟女聞地籟而未聞天籟
子遊曰地籟則衆竅是己人籟則比竹是己敢問天
籟曰夫吹萬不同而使其自己也成其自取怨者誰

即註籟簫也猶云聲也左思吳都賦擢歌唱簫籟鳴
註籟三孔笛也凡孔竅機括皆曰籟書禹貢篇三江
既入三江在蘇州府崑山縣南九里唐仲初吳郡賦
注松江七十里分流東北入海者為婁江東南流者
為東江併松江為三江口其地今亦名三江口吳越
春秋范蠡出遊三江即此郭璞山海經註岷山大江
所出岷山南江水所出岷山北江水所出三江皆原
出于蜀而注震澤禹貢但言入耳此與仲初註異勞
歌見之問篇屈原自投汨羅宋玉悲
其師見放而死以詞招之名曰招魂

夕次舊吳

張九韶三吳記東吳蘇州中吳潤州西吳湖
州舊吳吳之舊都即蘇州也潤州今鎮江府

維舟背楚服振策下吳畿盛德宏三讓雄圖枕九圍黃

池通霸業赤壁暢戎威文物俄遷謝英靈有盛衰行歎
鴟夷沒遽惜湛盧飛地古烟塵暗年深館宇稀山川四
望是人事一朝非懸劍空留信亡珠尚識機鄭風遙可
託關月眇難依西北雲逾滯東南氣轉微徒懷伯通隱
多謝買臣歸唯有荒臺露薄暮濕征衣

楚服楚地也如侯服甸服之服註服事也謂田賦之
事也王都曰畿吳畿以吳之舊都言即蘇州也三讓
指泰伯也詩商頌長發篇帝命式于九圍註九圍九
州也春秋傳魯哀公十三年公會單平公晉定公吳
夫差于黃池爭先軟吳人曰于周室我為長晉人曰
于姬姓我為伯趙鞅欲與吳戰司馬寅曰肉食者無

墨今吳王有墨其以國勝乎太子死乎且夷德輕不
忍久請少待之乃先吳人時越入吳殺王子地劉備
與曹操戰敗奔孫權操遂東下權遣周瑜魯肅等與
備迎擊于赤壁大破之赤壁在今湖廣黃州府城東
南十五里鵠夷馬羊也子胥諫夫差不聽賜錫鏹之
劍以死以馬羊葬其尸投之江石范蠡相越滅吳棄
官遊五湖自號鵠夷子皮湛盧飛見螢火賦四望見
崔駰馬篇吳季札過徐徐君愛其寶劍口不敢言札
心知欲獻之使還復過徐徐君已死札解劍懸墓而
去戰國策張丑質于燕燕欲殺之走出境境吏得丑
丑曰燕欲殺我者人有言我有寶珠也今我已失之
而燕不信我我且言子奪我珠而吞之王必劊子之
腹吏恐放之伍員得罪于楚欲奔吳至昭關關吏執
之員亦云云吏亦釋之鄭宏採薪白鶴山得一箭有
一人見而取之宏即還之問宏何所欲宏識其神人
也曰常惠若耶溪載薪為難願旦南風暮北風後果

然故若耶溪至今猶然號鄭公風今名樵風湮在紹興東二十五里關月疑是關月見高四篇夢月註若作關月即與關山同然不應虛對關澤亦吳人也西北雲見白雲抱幽石篇秦皇時望氣者云東南有天子氣故始皇東遊以厭之後漢梁鴻字伯鸞其妻孟光字德曜隱於吳依富人皋伯通廡下為人賃舂其妻具食舉案齊眉伯通異之舍之於家後病因告其妻曰我死慎勿持我喪去及卒伯通葬之要離冢旁口要離烈士伯鸞清高可相近也買臣事見詠懷古意上裴侍郎篇荒臺露見宿仙庄篇

過故宋

故宋地名史記穰侯傳須賈曰割晉國秦兵不攻而魏必效絳安邑又為陶開兩道幾盡故宋註此時宋已滅時秦盡得故宋地也故曰故宋漢為梁國治碭縣后遷治睢陽縣東漢國除晉

改碭郡隋置宋州改縣曰宋城大業初改州曰梁郡唐初為宋州後為睢陽郡五代梁為宣武軍唐改歸德軍宋升南京以太祖嘗節度受禪也治宋城金改府曰歸德後改宋城曰睢陽元因之本朝降為宋州以睢陽縣入屬開封府

舊國千年盡荒城四望通雲浮非隱帝日舉類遊童綺琴朝化洽祥石夜論空馬去遙奔鄭蛇分近帶豐池文斂束水竹影漏寒叢園兔承行月川鳥避斷風故宋城難定從梁事未工唯當過周客獨愧吳臺空

四望見崔駙馬篇雲浮隱帝見詠雲酒臨碭註黃帝將見大隗于具茨之山方明為御昌寓驂乘張若謂

朋前馬昆閭滑稽后車至於襄城之野七聖皆迷無
所問逢遇牧馬童子問逢焉黃帝曰異哉小童請問
治天下小童曰予少而身遊於六合之內子適有瞽
病有長者教予曰若乘日之車而遊於襄城之野今
予病少瘥予且復遊於六合之外矣治天下亦若此
而已予又奚士焉又舉頭見日事見高四篇蔡邕有
琴名綠綺化洽引子賤鳴琴事見韋明府宅宴詩春
秋傳僖公十六年春隕石于宋五隕星也六鷁退飛
過宋都風也周內史叔興聘于宋宋襄公問焉曰是
何祥也吉也馬在對曰今茲魯多大喪明年齊有亂
君將得諸侯而不終退而告人曰君失問是陰陽之
事非吉也所由生也吉也由人吾不敢逆君故也論
語之考識曰殷感妲己玉馬走宋任昉勸梁武進牋
曰是以玉馬駿奔來微子之去金版出地告龍逢之
怒註玉白也金版見論註陰戲識曰庚子之旦金版
尅書出地中曰臣族雲王禽宋穆公疾召大司馬孔

父立其弟與夷使其子馮出居鄭故左傳云宋殤公之即位也公于馮出奔鄭鄭人欲納之漢高微時被酒夜徑大澤中有大蛇當徑拔劍斬之后蛇所有老姬哭曰吾子白帝子也化為蛇當道今赤帝子斬之因忽不見大澤在今徐州豐縣西二十里今名斷蛇溝東水東帶之水也寒叢猶言寒林林疎影出如漏然耳謝惠連雪賦梁王不悅遊于兔園乃置旨酒命賓友召鄒生延枚叟註孝王漢實太后愛子景帝母弟有園名曰兔苑孝王卒太后哀慕之景帝以其苑令民得耕種乃置宮中籍其租稅以供祭祀其簿籍皆俚語文字故鄉俗所誦謂之兔園冊行月見遠使海曲篇川鳥斷風即六鷁退飛事從梁指漢景帝時梁王有異謀公孫勝羊說等附之後俱伏誅詩國風黍離篇朱傳云周室東遷大夫行役過于宗周見宗廟宮室盡為禾黍憫周室之顛覆徬徨不忍去故因所見以起興吳臺見宿仙庄詩

詠懷

少年識事淺不知交道難一言芬若桂四海臭如蘭寶劍思存楚金鎚許報韓虛心徒有託循迹諒無端太息關山險吁嗟歲月闌忘機殊會俗守拙異懷安阮籍空長嘯劉琨獨未懽十步庭芳歛三秋隴月團槐疎非盡意松晚夜凌寒悲調絃中急窮愁醉裏寬莫將流水引空向俗人彈

如蘭見靈泉頌伍員與申包胥為友員奔吳臨別與之劍曰我必覆楚也包胥曰我必復之后伍員以吳

兵入郢鞭平王尸昭王奔包胥乞秦師敗吳兵昭王
反國張良五世相韓韓亡不愛萬金之產為韓報讐
秦皇東遊至博浪沙中良使力士操鐵椎擊之誤中
副車始皇大驚令天下大索十日不得阮嘯見遠使
海曲篇劉琨晉人字越石守晉陽為胡騎所圍窘迫
無計乃登樓乘月清嘯賊聞之皆悽然長嘆中夜奏
胡茄賊流涕歔歔有懷土之切向曉復吹之賊並棄
圍而走後與段匹碑期討石勒碑從弟末波納賂
不進匹碑奔其兄喪琨遣子羣送之為末波所獲波
厚禮之許以琨刺幽州共結盟襲匹碑遣齋羣書納
琨約為內應為碑邏騎所得碑遂拘琨琨殊無此意
自知必死神色怡然為五言詩贈其別駕盧諶竟為
匹碑所縊諶率琨餘衆依末波朝廷以匹碑尚強冀
其平河朔不為琨舉哀溫躋表琨忠數歲乃贈太尉
答盧諶書極哀慘見秋日送別詩註十步庭芳見秋
菊詩槐疎見咏蟬序註窮途見蓬萊鎮流水引見高

四篇

邊夜有懷

漢地行逾遠燕山去不窮城荒猶築怨碣毀尚銘功古
戍烟塵暗邊庭人事空夜關明隴月秋塞急胡風倚伏
良難定榮枯豈易通旅魂勞泛梗離恨斷征蓬蘇武封
猶薄崔駰官不工唯余北叟意欲寄南飛鴻

漢地猶云漢騎胡人指中國也燕山今天壽山賈誼
過秦論阿房築愁長城築怨一夫作難而七廟隳身
死人手為天下笑碣當是碣字石碑之小者古今原
始云秦王登之罘山刻石頌功后世碑銘始此然禹

已有碑矣老子順化華禍兮福之所倚福兮禍之所
伏孰知其極泛梗見浮查篇征蓬見泊河曲篇蘇武
使匈奴不屈被留十九年乃歸漢封為典屬國李陵
在匈奴答武書曰聞子之歸賞不過二百萬位不過
典屬國在駟與班固傳毅同時齊名常以典籍為業
未遑仕進時人或譏其大玄靜將以后名失實駟儼
楊雄解嘲作達旨以答之後為實憲掾察高第出為
長岑長自以遠去不得志遂不至官而歸卒于家北
史意見憲臺出繫篇南飛鴻見

蕩子從軍賦同道書來鴈飛註

燕山漢為幽州治薊縣元鳳初改廣陽郡本始初更
廣陽國東漢復為幽州三國魏改燕國晉改范陽國
後魏於薊立燕郡又於郡置幽州后周立總管於幽
州隋省州入涿郡唐初復為幽州開元中改范陽郡
乾元初復為幽州遼初改幽都府後改析津府宋改
燕山府金改大興府元改大都路洪武初為北平布

政使司太宗封此為燕王後靖難遷
都改順天府以大興宛平貳縣附

久戍邊城有懷京邑

擾擾風塵地遑遑名利途
盈虛一易舛心跡兩難俱
弱齡小山志寧期大丈夫
九徵光賁玉千仞忽彈珠
棘寺遊三禮蓬山遙八儒
懷鉞慙后進投筆願前驅
北走非通趙西之似化胡
錦車朝促候刁斗夜傳呼
戰士青綵絡將軍黃石符
連星入寶劔半月上雕弧
拜井開疎勒鳴桴動密須
戎機習短蔗祆授靜長榆
季月爰初盡邊

亭草早枯層陰籠古木窮色變寒蕪海鶴聲嘹唳城烏
尾畢逋葭繁秋引色桂滿夕輪孤行役風霜久鄉西夢
想徒霸池遙夏國秦海望陽紆沙塞三千里京城十二
衢楊溝連鳳闕槐路儼鴻都璧殿規宸象金隄法斗樞
雲浮西北蓋月照東南隅寶帳垂連理銀床轉轆轤廣
筵留上客豐饌引中厨漏緩金徒箭嬌繁玉女壺秋濤
飛逾馬春水泛仙臚意氣風雲合言忘道術趨共矜名
已泰詎肯沫相濡有志漸雕朽無庸類散樗開山漸超

忽形倦歎艱虞結網空知羨圖榮豈自誣忘情同塞馬
比德類宛駒隴坂肝腸絕陽關亭障迂迷魂驚落鴈離
恨斷飛鳬春去容華盡年來歲月無邊愁傷郢調鄉思
繞吳歛河氣通中國山途限外區相思若可寄冰泮有
銜蘆

風塵見江南贈之問篇遑遑猶皇皇也韓文孔聖亦
云其遑遑易消息盈虛與時偕行心迹見晚憩田家
篇人生十年曰幼弱任彥升天監策問朕本自諸生
弱齡有志小山見早發睢口篇大丈夫即景春所謂
大丈夫也黃帝內傳王母授帝洞霄盤雲九華燈藥
二此燈名之始漢武內傳七夕掃除宮掖張雲錦之

惟然九微燈夜二唱后西毒駕九色班龍上殿賁玉
光彩如玉也千仞彈珠見之間篇棘寺梅之以棘如
今之棘聞也或曰植棘於庭禮所謂聽之槐棘之下
是也禮記十七篇魯高堂隆得之后瑕丘蕭奮以授
同郡后蒼后蒼授梁人戴德及德從兄子聖沛人慶
普於是德為大戴禮聖為小戴禮普為慶氏禮三家
皆立博士謂之三禮漢李咸學魯詩春秋公羊傳三
禮是也蓬山見寄東臺詳政學士詩左傳僖子使助
蓬氏之蓬註蓬列也所謂駕蓬是也陶潛八儒序曰
夫子沒后散於天下設於中國成百代之原為紀綱
之儒居環堵之室華門圭竇瓊繩樞并日而食以
道自居也為有道之儒于思氏之所行也衣冠中勳
作慎大讓如慢小讓如偽者于張氏之所行也顏氏
傳書為道為諷諫之儒孟氏傳書為道為疏通知遠
之儒漆雕氏傳禮為道為恭儉莊敬之儒仲梁氏傳
樂為道以和睦陰陽為移風易俗之儒樂正氏傳春

秋為道為屬詞比事之儒公孫氏傳易為道為潔靜
精微之儒揚子雲草大玄嘗懷鉛提槧投筆見泊蒲
類詩北走見之間篇漢馬援傳耿舒與兄弇書曰馬
伏波類西域賁胡到一處輒止以是失利言其征交
趾五溪蠻事也刁斗見蕩子篇銅焦註又虞子陽霍
將軍北伐詩羽書時斷絕刁斗晝夜驚漢官儀宮城
門擊刁斗周廬擊木析黃石符見白雲抱幽石詩連
星見螢火賦拜井見靈泉頌桴所以擊鼓禮黃桴土
鼓左傳密須氏之鼓魏文典論曰常與平虜將軍劉
歆舊威鄧晨等共飲宿聞晨有手臂曉五兵余與論
叙良久謂余言將軍法非也求與余對酒酣耳熱方
食芋糜便以為杖下殿數交三中其臂左右大笑袂
宇與襖同嘹唳鶴聲也陶宏景詩凄切嘹唳夜傷情
城烏句見泊江鎮詩詩秦風蒹葭篇蒹葭蒼蒼白露
為霜言霜始降而葭尚蒼即引色之意也桂蒲句指
月也詩人多以桂輪指月如張喬月詩盈缺青冥外

東風苦欲吹何人種丹桂不長出輪枝度信詠月天
漢看珠蚌星橋視桂花飛重輦闕英落獨輪斜梁
簡文詠月詩飛輪了無轍明鏡不安臺鄉西即西鄉
也見崔駰馬詩霸池即霸水見發諸暨詩夏國今寧
夏是也前漢書地理志河內曰冀州其山曰霍數曰
陽紆爾雅秦有陽紆沙塞三千里言遠也班固西都
賦披三條之廣路立十二之通門內則街衢洞達則
十二門自有十二衢矣京城御溝旁植楊柳謂之楊
溝鳳闕見秋雲篇長安街道皆植槐柳故云槐路又
漢元始中起辟雍明堂為博士舍列槐樹數行諸生
每朔望各持方物交易號曰槐市云槐路即此也漢
靈帝置鴻都門學諸生皆教州郡三公舉用辟召或
出為刺史太守入為尚書侍中有封侯賜爵者士君
子皆耻與列馬壁殿以石砌壁如玉也規法也宸象
天象也天上有白玉堂羣仙所會之處金隄亦以色
而言也斗樞見高四篇天樞註長安亦謂之北斗城

皆以帝極言之也浮雲句見紫虛觀篇月照疑當作
日照東南隅用天子氣事見夕次舊吳篇帟垂連理
織連理木之文於其上如蕩子篇所謂蓮花帳也淮
南子百尺高樓與天連后園作井銀作床金瓶素綆
汲寒漿轆轤絞水之輪施於井上刻為轆轤之形或
作鹿盧字梁劉綽班婕妤怨詩玉闌金井牽鹿盧丹
梁翠柱飛流蘇豐饌句見初秋登司馬樓序城隅註
漏刻之法又水置溜中以浮刻漏之箭謂之竹箭唐
詩所謂竹箭水繁更漏促是也或以金為九從格上
流轉而下投銅壺中鏗然有聲謂之銀箭亦謂之金
箭徐陵賦厭長樂之疎鍾勞中營之緩箭是也神異
經云東王公與玉女投壺更投十枝一十二百枝為
一百二十桌設有人不出者天帝為之擊唾泉一作
嬌夫躍也亦音驕一作嬌楊大年詩書題柱是藏三
尺壺矢誰同賽百嬌謝無逸詞雙架枕百嬌壺濤喻
馬見度瓜步詩壺船頭也謝瞻詩榜人理行壺仙壺

即仙舟也見之問篇李仙註意氣風雲道術俱見高
四篇莊于大宗師篇泉涸魚相與處於陸相啣以濕
相濡以沫不如相忘於江湖與其譽堯而非桀也不
如兩忘而化其道雕朽散擗見浮查篇列子湯問篇
太行王居二山方七百里高萬仞本在冀州之南河
陽之北北山愚公者年且九十面山而居懲山北之
塞出入之迂也聚室而謀曰吾與汝畢力平險指通
豫南達于漢陰可乎雖然相許其妻獻疑曰以君之
力曾不能損魁父之邱如太行王屋何且焉置土石
雜曰投諸渤海之尾隱士之北遂率子孫荷擔者三
月叩石墮壤箕畚運於渤海之尾鄰壠遺男始亂往
助之寒暑易節始一反焉河曲智叟笑而止之曰甚
矣女之不慧以殘年餘力曾不能損山之一毛其如
土石何愚公長息曰女心之固固不可徹不若孀妻
弱子雖我之死有子存焉子又生孫孫又生子子又
有子子又有孫子子孫孫無窮匱也而山不加增何

若而不平智叟無以應操蛇之神聞之惧其不已也告於帝帝感其誠命夸娥氏之子負二山一措朔東一措雍南冀之南漢之陰無隴斷焉艱虞見在獄詠蟬篇結網見張平子墓塞馬見寒夜有懷詩北叟註宛地出良馬武帝使李廣利伐取之比德用驥稱其德意或曰駒作雛作雛小隴山在鳳翔府隴州西岩高險不通軌轍漢張衡詩我所思兮在漢陽欲往從之隴坂長又土人歌云隴頭流水鳴聲鳴咽遙望秦川肝腸斷絕陽關見在軍中贈先還篇玉門關註前漢書酒泉列亭障至玉門顧脣註亭望敵之所也障山中小城也顏師古曰漢制每塞山要險處別築為城因置吏士而為障蔽以打寇謂之候城此即障也張湯傳武帝謂博士曰吾使生居一障能無使虜入盜乎曰能於是遣乘障月餘匈奴殺之驚落鴈見遂中有懷篇虛彎註飛鳬見紫雲觀序郢調見之間篇左思吳都賦荆豔楚舞吳歆越吟陳后主聽事詩秦

聲本自楊家解吳飲那知謝傳憐註吳歌曰飲詩苦
葉篇雖雖鳴鴈旭日始旦士如歸妻迨冰未泮張華
鷓鴣賦彼日辰兔與歸鴈又矯翌而增逝咸美羽而
豐肌故無罪而皆斃徒銜芦以避繳終為戮於斯世
註鴈水泮北歸體肥銜芦以避
繒繳之患言欲托之寄相思也

幽繫書情通簡知己

昔歲逢楊意觀光賁楚材穴疑丹鳳起場似白駒來一
命淪驕餌三緘慎禍胎不言勞倚伏忽此遘遭迴驄馬
刑章峻蒼鷹獄吏猜爭練非易辨疑壁果難裁際拙慚
周美端憂滯夏臺生涯一滅裂岐路幾徘徊青陸芳春

動黃沙旅思催圓扉長寂寂疎網尚恢恢入窅方搖尾
迷津正暴腮覆盆徒望日蟄戶未驚雷霜歇蘭猶敗風
多木屨摧地幽蠶室閉門靜雀羅開自憫秦冤痛誰憐
楚奏哀漢陽窮鳥客梁甫卧龍才有氣還衝斗無時會
鑿坏莫言韓安國長作不然灰

蜀人楊意得幸漢武薦司馬相如所為文由此得進
觀光見之問篇春秋傳蔡聲子通使于晉還如楚令
尹子木與之語問晉大夫與楚孰賢對曰皆卿材也
如杞梓皮革自楚往也晉有姻族而用楚材實多山
海經距齊州以南戴日為丹穴丹穴之山有鳥五采
而文曰鳳詩小雅白駒篇皎皎白駒食我場苗繫之

維之以永今朝註托言賢者所乘之駒食苗而繫維
之使其人因不得去也禮一命齒于鄉里家語一命
而俯言始受君命為官也驕餌見高四篇孔子觀于
周廟有金人焉三緘其口而銘其背曰磨光肩古之
慎言人也曰無多言多言多敗無多事多事多害倚
伏見邊夜有懷詩易屯如遭如桓典為御史嘗乘驄
馬宦官貴戚為之語曰行行止止避驄馬御史鄧都
為中尉嚴酷行法不避貴戚列侯宗室見都側目號
曰蒼鷹漢薛宣守臨淮民有持鰲者出遇雨而因以
自蔽有一人后至求分蔽其半既別遂爭之聞于宣
宣命斷為二而分之因罪求分者張儀從楚相飲已
而相亡壁門下意儀掠笞數百不服釋之儀妻曰吁
子無讀書遊說安得此辱儀曰視吾舌尚存否及相
秦撤楚相曰吾不盜汝壁今且盜而城美里城名在
今河南彰德府湯陰縣北九里一名牖城北臨美水
紂以鄧侯女不喜淫殺之而及鄧侯九侯爭又醢之

文王聞之而歎遂囚之羑里桀囚湯於夏臺莊子養生篇吾生也有涯而知也無涯以有涯隨無涯殆已註生涯謂所稟之分量各有極也知謂人心無限量也莊子吾滅裂而耕則其實亦滅裂而報爭歧路見紫雲觀篇莊子徜徉乎其側徘徊乎其下又見下文謝元暉詩青陸日所行之道春行青陸猶言北陸南陸也黃沙邊塞地皆黃沙圓扉獄戶以圓木為扉也老子任為韋天網恢恢疎而不漏司馬遷報任安書猛虎在深山百獸震恐及在檻穽之中搖尾而求食積威約之漸也交州記龍門水深百尋大魚登此化龍不過者膝腮點額血流此水恒如丹池謝元暉觀朝雨詩戡盟希驥首乘流畏曝腮動息無兼遂歧路多徘徊覆盆見螢火賦禮記月令仲春之月雷始發聲蟄蟲啟戶始出韓詩外傳孔子聞哭聲甚悲乃舉魚也問之曰木欲靜而風不止子欲養而親不在遂自刎司馬遷報任安書李陵既生降墮其家聲而僕

又餌之蠶室註密室如飼蠶之室腐刑者下之恐通
風致死也雀羅見高四篇秦憲衝斗俱見螢火篇楚
奏見之間篇趙壹字元叔漢陽西縣人抵罪幾至死
友人救之得免乃貽書謝恩作窮鳥賦以貽之諸葛
亮隱隆中作梁甫吟曰步出齊城門遙望蕩陰里里
中有三墳景景正相似問是誰家墓田疆古冶氏力
能排南山文能絕地理一朝被讒言二桃殺三士誰
能為此謀相國齊晏子註齊景公有士三人田開疆
古冶氏公孫接恃功恣行無憚公患之晏子請公餽
之二桃令計功而食田古論功先食公孫自刎田古
慚亦自刎焉孔明出齊城門作是吟以歎之蠶坏見
酬思玄上人篇不然灰見螢火篇漢陽非今之漢陽
乃漢郡名治冀縣三國魏置秦州晉改漢陽為天水
郡治上街尋廢復置秦州宋齊復為天水郡隋廢郡
為秦州大業初復為天水郡唐復為秦州天寶初改
天水郡乾元初復為秦州后移治成紀宋開禧為天

水軍治天水縣金為鎮遠軍治成紀元復為秦州以
成紀縣省入今因之改屬鞏昌府梁父太山下小山
名漢以名縣始皇封太山立石下禪梁父即此也父
音甫故又作甫在今秦安州東南一百一十五里蔡
邕琴韻曰梁甫悲吟周公越裳琴操曾子耕太山
遇雪旬月不得歸作梁山歌后因為梁父之曲

寒夜獨坐遊子多懷簡知己

故鄉眇千里離憂積萬端
鵲服長悲碎蝸廬未卜安
富鈎徒有想貧鈇為誰彈
柳秋風葉脆荷曉露文團
晚金薰岸菊餘佩下幽蘭
伐木傷心易維桑歸去難
獨有孤明月時照客庭寒

子夏家貧衣若懸鵠人曰子何不仕曰諸侯之驕我者吾不為臣大夫之驕我者吾不復見魏焦光字孝然結草廬於河間號蝸牛廬呻吟其中后野火燒之乃露寢雪中袒臥人視之並如故后百餘歲卒張氏世為功曹晨起有鳩從承塵飛下功曹曰鳩為我禍耶當往承塵上為我福耶即入我懷中遂入懷探之得銅鈎因帶之官至數郡子孫或至九卿后張氏婢受蜀賈賂竊鈎以去張漸衰或告賈人曰天命不可力求也反張氏遂復昌故關西稱張氏傳鈎云人吳越春秋闔閭令國中作金鈎令曰若善鈎者賞百金有貪賞者殺二子以血零鈎遂命曰吳鈎此則劔也貧缺見懷古上裴侍郎詩幽蘭伐木見酬思玄上人維桑見送閭五序陶淵明為彭澤令賦歸去來詞歸隱末二句意見送吳七遊蜀

叙寄員半千

半十字榮期王義方嘗曰五伯歲一賢者生于宜當之
因改今名本宋劉凝十世孫凝因齊受禪奔魏自比伍
員改姓員唐諺云令公四俊苗李崔員以後證先員音
運陸龜蒙誤讀作先韻其詩曰賴得伍員騷思少夫差
剛免似荆懷宋人小說龜蒙博學誤讀以此按字書員
有真先運三韻如生員之員方員之員皆先韻但字皆
从口不从厶俗从厶非也鄙語云私和去吉勾勾呂台
如何通用半千羈邕通書史舉童子對詔高第長事王
義方以邁秀見賞凡八科舉皆中上書自陳願得天下
英才與權所長有一居先臣當伏死都市不報調武陟
尉矯令殷子良旨發粟賑民刺史大怒下之獄薛元超
責太守釋之俄舉岳牧對三策舉高第武后擢正諫大
夫忤旨遷水部郎中武三思忌之出刺蘄濠二州半千
事五君有清白節年老不哀樂山水自放卒吏民哭野
中

薄宦三河道自負十餘年不應驚若厲祇為直如弦坐
歷山川險吁嗟陵谷遷長吟空抱膝短翮距沖天魂歸
滄海上望斷白雲前釣名勞拾紫隱跡自談玄不學多
能聖惟思鴻寶仙斯志良難已此道豈徒然嗟為刀筆
吏耻從繩墨牽岐路情難狎人倫地本偏長揖謝時事
獨往訪林泉寄言二三子生死不來旋

阮籍詠懷詩反顧望三河詳見春霽早行篇註藉於
魏末晉文王之代慮禍此詩多刺時人情薄逐勢利
晉文王河內人故托稱三河其地謂河南河內河東
也乾之九三日君子終日乾乾夕惕若厲無咎唐人

以若厲為句如韓文公讀禮記儒行以聞流言不信
其行為句也漢順帝末童謠曰直如弦死道邊曲如
鈎反封侯袁淑效曹子建樂府五侯競書幣羣公亞
為言義分明於霜信義直如弦詩十月之交篇高岸
為谷深谷為陵謂遷易常處也此二句亦指人情言
之孔明隱於隆中抱膝長吟短翮見懷古上裴侍郎
魏說趙欽共尊秦為帝以却其兵魯仲連往見魏使
新垣衍曰彼秦者棄禮義而尚首功之國也彼即肆
然而為帝於天下則連有蹈東海而死耳不願為之
民也衍起再拜曰吾乃今知先生天下士也不敢復
言帝秦矣又孔子觀滄海之橫流慨然歎曰文王既
沒文不在茲乎白雲拾紫談玄俱見高四篇多能聖
指孔子也漢宣帝信神仙方術淮南王有枕中鴻寶
苑秘書言神仙使鬼丹砂為金之術及鄒衍重道正
命方世人莫見而劉更生父德武帝時治淮南獄得
書更生幼誦讀以減死論沈佺期詩靜夜思鴻寶清

晨朝鳳京汭黠責張湯曰天下謂刀筆吏不可為公卿果然必湯也今天下重足而立孟子大匠不為拙工改廢繩墨猶言法度也岐路見紫雲觀篇地偏見秋日山行篇李陵答蘇武書長與足下生死辭矣即此詩末二句之意

棹歌行

漢武帝幸河東祀后土作秋風辭曰秋風起兮白雲飛草木黃落兮鴈南歸蘭有秀兮菊有芳懷佳人兮不能忘泛樓船兮濟汾河橫中流兮揚素波簫鼓鳴兮發棹歌歡樂極兮哀情多少壯幾時兮奈老何棹歌行本此

寫月圖黃罷凌波拾翠通鏡花搖菱日衣麝入荷風葉

露舟難蕩蓮疎浦易空鳳媒羞自託駕翼恨難窮秋帳
燈光翠侶棲粉色紅相思無別曲併在棹歌中

梁江淹別賦慚幽宮之錦瑟悔臺上之流黃張載擬
四愁詩佳人遺我筒中布何以報之流黃素註后周
靜帝令宮人黃眉墨粧至唐猶然溫飛卿有豹尾車
前趙飛燕柳風吹散娥間黃之句馮偉壽春雲怨詞
宮黃額試王荊公亦云漢宮嬌額半塗黃已起于漢
又幽怪錄神女皆瓊額黃則效而塗之者也凌波見
詠美人篇庾信鏡賦臨水則池中月出照日則壁上
菱生梁庾肩岳尋周弘靖詩石鏡菱花發桐門琴曲
秋衣麝衣之香也荷衣之色也左傳魯僖公三年齊
桓公與蔡姬乘舟于圓蕩公公懼變色禁之不可公
怒歸之未之絕也蔡人嫁之明年遂侵蔡伐楚為召
陵之盟司馬相如以琴音挑卓文君曰鳳兮鳳兮歸

故鄉遨遊四海求其鳳文君喻其音遂自奔相如干
寶搜神記宋大夫韓朋妻美宋康王奪之朋怒王囚
之因自殺妻乃陰腐其衣襟與王登臺自投而下左
右攬衣不勝手遂死遺書于帶曰願與韓氏屍共葬
王怒異其兆域二塚相對經宿忽有樹生二塚上根
交枝連有鳥如鴛鴦各棲樹朝暮悲鳴而舞其音感
人

傷祝阿王明府

有序

阿春秋時齊桓公與魯會柯而盟即此后為祝
阿戰國末屬秦漢置東阿縣屬東郡晉屬濟北
國隋屬北齊郡唐初屬濟陽郡後屬鄆州宋屬
東平府元因之今改屬兗州徐廣曰史記齊之
東阿縣繒帛所出故曰阿縞子虛賦被阿錫
漢房中歌曳阿錫如淳曰阿細繒錫細布

夫心之悲矣非關春秋之氣聲之哀也豈移金石之音
何則事感則萬緒興端情應則百憂交軋是以宣尼舊
館流襟動激楚之悲孟嘗高臺承睫下聞琴之淚

禮孔子之衛遇舊館人之喪入而哭之哀出使子
貢脫駟以賻之子貢曰于門人之喪未有所脫駟
脫駟于舊館無乃已重乎孔子曰吾鄉也入而哭
之遇于一哀而出涕予惡夫涕之無從也小子行
之孫綽徐君墓頌徘徊立側淒焉流襟楚詞招魂
篇宮庭震驚發激楚些枚乘七發于是發激楚之
清風揚鄭衛之皓樂註激楚曲名悲歌也孟嘗君
謂雍門周曰先生鼓琴能令我悲乎周曰千秋萬
歲后高臺傾曲池塹墳墓平嬰兒豎子樵採其上
躑躅其足而歌曰夫以孟嘗君尊貴乃若是乎孟

嘗若遂泣下增哀睫目邊毛也列于焦螟飛而集於蚊睫弗相觸也雍門在今徐州城東南五十里

祝阿王明府毓得丹穴襲吉黃裳靈基峙金闕之峯層
源瀨玉輪之坂既而鴻飛漸陸將聘平與之龍鶴鳴在
陰爰絆朝歌之驥乃當名縣闕月德貫陳星豈徒遽切
夢瓊掩沈連石

丹穴見幽繫書情穴疑丹鳳起註易坤六五黃裳元
吉象曰黃裳元吉文在中也東方朔神異經北方中
有金闕高百丈詳見軍中贈先遠篇玉輪坂地名洛
江之水所經易漸九三鴻漸于陸大征不復象曰夫
征不復離羣醜也汝南許劭與兄虔俱知名汝南人
稱平與之淵有二龍鶴鳴在陰見王明府叅選詩此

取陰字淮南子曾子至孝不過勝母墨子雖樂不入
 朝歌鄒陽上吳王書里名勝母曾子不入邑號朝歌
 墨子回車子建與吳質書墨翟不好妓何為過朝歌
 而迴車乎閏月陳星俱見贈之間篇春秋傳魯聲伯
 夢涉洹或與已瓊瑰食之泣而為瓊瑰從而歌曰濟
 洹之水贈我以瓊瑰歸乎歸乎瓊瑰盈吾懷乎惧不
 敢占也還自鄭壬申至于狸賁而占之曰余恐死故
 不敢占也今衆繁而從余三年矣無傷也言之之莫
 而卒淮南子日出於暘谷浴於咸池拂於扶桑晨明
 登於扶桑之上爰始將行是謂朏明至於曲阿是謂
 朝明隱于曾泉是謂早食次于桑野是謂晏食發於
 衡陽是謂禺中對于昆吾是謂正中靡于烏次是謂
 小運至于悲谷是謂晡時廼于女紀是謂大運經于
 隅泉是謂高舂頓于連石是謂下舂爰止羲和爰息
 之螭是謂懸車薄于崦泉是謂黃昏淪于蒙谷是謂
 定昏日入崦嵫經細柳入虞泉之地曙于蒙谷之浦

日西垂景在於樹端謂之桑榆註
連音爛連石西北之山陰地也

平與古沈子國戰國屬楚后屬秦漢置平輿縣以汝
南郡治此後廢隋復置王世充置輿州唐州廢元省
入汝陽縣故城在汝
寧府城西汝水之南

朝歌古邑名本紂所都武王分其地北為邶南為鄘
東為衛春秋時邶鄘皆入於衛戰國屬魏秦屬河東
郡漢為汲縣地屬河內郡曹魏置朝歌郡屬冀州晉
改汲郡后魏改義州后周改衛州隋改汲郡唐復為
義州尋改衛州屬河北道宋因之金改
河平軍元改衛輝路今為府屬河南

嗟乎輪銷挂魄驪珠毀貝闕之前斗散紫氛龍劍沒延
平之水某夙承嘉惠曲荷恩光留連嘯歌從容風月撫

心陳迹泣血漣如

漢武悼夫人賦秋氣慘以淒淒兮桂枝落而銷亡註以桂枝芳香喻夫人也愚按此乃以月言之蓋花殘月缺之意也驪珠見高四篇貝闕見泊河曲篇劉公幹贈從弟詩鳳凰集南岳徘徊孤竹根於心有不厭香翮凌紫氛註紫氣天氣也雷煥發劍之后斗牛間紫氣漸散餘見螢火篇詩小雅白華篇嘯歌傷懷念彼碩人註云使我嘯歌傷懷而念之也風月懷舊之意易屯之上六乘馬班如泣血漣如連垂涕之貌

然而始終者萬物之大歸生死者百年之常分雖則知理之可有而未曉情之可無聊綴悲歌敢貽同好諸君或締交三益列宰一同或叶契筌蹄投心膠漆如比肩

於千里遽傷魂於九原既切之焚彌深蕙歎盡言四始
同賦七哀庶蘭室流薰襲遺芳而化德故蓬心深拙效
庸音於起予觸目多懷周增流動

陸機弔魏武夫始終者萬物之大歸生死者姓名之
區域是以臨喪隕而復悲觀陳根而絕哭今乃傷心
百年之際興哀無情之地意者無乃知哀之可有而
未識情之可無乎張蔚與蔣詡羊仲為三益之友左
傳子產曰天子之地一圻大國一同註方百里曰同
塗蹄見高四篇膠漆見靈泉頌千里見寶六郎宅宴
人見樂大夫挽詞白馬故人註戰國策淳于髡一日
薦七人齊宣王曰寡人聞千里一士是比肩而至也
九原亦見樂大夫篇陸機歎逝賦信松茂而相悅嗟
芝焚而蕙歎本淮南子巫山之上順風縱火紫芝與

蕭父俱死栢悅蕙歎四始見閭五篇五際註陳思王
贈弟仲宣有七哀詩阮瑀王粲亦有七哀詩蘭室見
早秋出塞篇逢
心見發諸暨詩

洛川真氣上重泉惠政融含章光後烈繼武嗣前雄契
與良難驗生涯忽易窮翔鳬猶在履狎雉尚馴童錢滿
荒階綠塵浮虛帳紅夏餘將宿草秋近未驚蓬烟晦泉
門夕日遠夜臺空誰堪孤隴外獨聽白楊風

洛川真氣指王明府得洛水之秀氣也東觀漢紀王
阜為重泉令鸞集學宮阜使掾汝疊為張雅樂擊磬
鸞舉足垂翼應聲而舞翔翔縣庭留十餘日乃去易
坤之六三曰含章可貞或從王事無成有終晉辛曠

與皇甫謐書含光烈於千載之前吐英聲於萬世之
後詩大雅下武篇昭茲來許繩其祖武註武王之
昭明如此來世能繼其跡生涯見幽繫書情篇鬼履
見鄭安陽篇狎難馴童見韋明府宅宴詩沈約哀詩
高車塵未滅珠履故餘聲賓階綠錢滿客位紫苔生
言人跡罕到蒼苔不踐帳上虛光也苔錢見出石門
篇禮檀弓曾子曰朋友之墓有宿草而不哭焉註墓
上草根陳宿是期年之外可無哭矣蓬至秋而飛見
泊河曲篇泉門夜臺見樂大夫挽詞北土塚上多種
白楊陶潛挽歌詞荒草何茫茫白楊亦蕭蕭又見丹
陽刺史挽
詞青松註

五言絕句

在軍登城樓

城上風威冷江中水氣寒戎衣何日定歌舞入長安

書武成篇一戎衣而天下大定唐薛仁貴定天山還將士歌曰將軍三箭定天山將士長歌入漢關即此詩意

於易水送人一絕

此地別燕丹壯髮上衝冠昔時人已沒今日水猶寒

地名事蹟俱見高四篇

挑燈杖

稟質非貪熱焦心豈憚爇終知不自潤何處用脂膏

詠塵

凌波起羅襪含風染素衣別有知音調聞歌應自飛

凌波見詠美人詩染素衣見遂中有懷
詩知音見贈高四篇聞歌見塵灰篇

翫初月

忌滿光恒缺乘昏影漸流自能明似鏡何用曲如鉤

曲如鉤見叙寄員半千篇宋孝武齊中望月詩寒幕
蕩暄氣入夜漸流清齊虞羲詠秋月初生似玉鉤裁
滿如
團扇

詠照

鏡也

寫月無芳桂照日有花菱不持光謝水翻將影學冰

花菱見棹歌行鏡花搖菱註周庾信詠鏡詩玉匣聊
閒鏡輕仄暫拭塵光如一片水影照兩邊人月生無
有桂花閒不逐春試桂淮南竹堪能見四隣博物志
削冰令圓舉以向日以艾承其影則有火出鏡有陽
燧見螢火篇
故云學冰

詠鷺雜言

時年
七歲

鷺鷥鷺曲項向天歌白毛浮綠水紅掌撥青波

七言古風

上吏部侍郎帝京篇有啟

漢光武改常侍曹為吏部曹
主選舉是吏部尚書之始

某
啟昨引註日垂索鄙文拜手驚魂承恩累息楚顰
丹質在荆南以多慚遼豕白頭望河東而載慙

書周公拜手稽首註拜手首至手也稽首首至地也尹文子楚人握山雞路人問之曰此何鳥也對曰鳳凰也路人曰今始見鳳凰乎請償千金弗與加倍與之方欲獻諸王經宿而死路人不遑惜其千金惟恨不得獻王王聞之感其欲獻已召厚贈之過買鳳之金十倍顰即雉也以其丹質遂以為

鳳耳荆南今荆州也光武討王郎彭寵發突騎轉糧食前後不絕負功望高帝接之不能滿幽州牧朱浮與之書曰臣見遼東有豕生子白頭適欲獻之道遇羣豕皆白以子之功論於朝廷遼東豕也寵遂反攻浮司馬相如封禪文以登介邱不亦慙乎註心慚曰慙音女六反

某
散樗易朽蟠木難容雖少好讀書無謝高鳳而老

不曉事有類楊雄徒以易象六爻幽贊適乎政本詩
人五際比興在乎國風

散材蟠木俱見浮查篇高鳳字文通好學妻之田
晒麥於庭令鳳護雞天暴雨鳳誦經不覺潦水流
麥妻還怪問鳳始知之楊修答曹楨書曰修家子
雲老不曉事強著一書悔其少作若比仲山周旦

之徒則皆有愆乎蓋指劇秦美新之作也易繫詞
曰昔者聖人之作易也幽贊於神明而生蓍參天
兩地而倚數五
際見間五官篇

故體物成章必寫情於小雅登高能賦豈圖容於大
夫蓋欲樂道遺榮從心所好非敢希聲刻鵠竊譽雕
虫至若質醜行以自譏銜庸音於苟進固立身之岐
路行己之外篇矣

登高能賦見北眺春陵篇鍾會有遺榮賦謝靈運
詩彭薛裁知耻貢公未遺榮言彭祖薛方不仕為
知耻貢禹見王陽登用而彈冠非遺榮者馬援兄
子嚴敦並好譏議通輕俠援在交趾還書戒之曰

龍伯高敦厚周慎口無擇言謙約節儉公
威吾愛之重之願汝曹效之杜季良豪俠好義憂
人之憂樂人之樂父喪致客數郡畢至吾愛之重
之不願汝曹效也效伯高不得猶為謹勅之士所
謂刻鵠不成尚類鶩者也效季良不得陷為天下
輕薄子所謂畫虎不成反類狗者也雕虫見初秋
司馬樓宴詩實讀曰贅班固張禹傳安昌貨殖
朱雲作謨註謨醜也去韻岐路見紫雲觀篇

君侯蘊明畧以佐時虛靈臺以照物觀梁父之曲識
臥龍於孔明聽康衢之歌得飯牛於甯戚是用異人
翹首俊乂歸誠

曹植誅王粲伊尹顯考奕業佐時本張衡歸田賦
遊都邑以永久無明畧以佐時靈臺見高四篇梁

父曲見幽繫書情詩劉備聞人歌此曲問誰所為
曰臥龍也遂三往顧之寤威齊人飯牛扣角而歌
曰南山矸白石爛生不逢堯與舜禪短布單衣纔
至矸長夜漫漫何時旦桓公聞之舉以為大夫才
過千人曰俊才
過百人曰义

猥以庇賤之姿謬奉清通之盼雖仲由之瑟終悶響
於丘門而宋玉之謠讜均音於郢路敢忘下里輕冒
上呈庶道叶起予陳卜商之四始恐吾幾失子効然
明於一言拜手增慚憂心如醉謹啟

宋玉郢路下里俱見之問篇詩序子夏所作故云
卜商之四始字見閻五篇五際註左傳賈辛將適

其縣見魏子曰辛來昔叔向適鄭駿歲惡欲觀叔向從收器者往立於堂下一言而善叔向聞之曰必然明也下執其手以上曰昔賈大夫惡其妻美三年不言不笑御以如皋射雉獲之其妻始言而笑賈大夫曰我不能射汝遂不言不笑射之不可以已也如是夫今子少不揚子若無言吾幾失子矣言之不可以已也如是夫遂如故知今女有力於王室晉是以舉汝行乎敬之哉無墮乃力

山河千里闕城郭九重門不覩皇居壯安知天子尊

九重見高四篇車數洛陽道詩洛陽道八達洛陽城九重重闕如隱起雙闕似芙蓉詩邦畿千里陳后主詩日月光天德山河壯帝居叔孫通起朝儀羣臣以次上壽無敢喧嘩失禮漢高數曰吾今日乃知皇帝之貴也

皇居帝里嶠函谷鵲野龍山侯甸服五緯連影集星躔
八水分流橫地軸秦塞重關一百二漢家離宮三十六
桂殿陰岑對玉樓椒房窈窕連金屋

嶠山名函谷關名左傳嶠有二陵詳見北眺春陵篇
漢書井十一度至柳三度為鵲首之次雍州之分鵲
野即鵲首之分野也唐都關中秦之故地班固西都
賦於是睇秦嶺瞰北阜挾鄠霸據龍首三秦記龍首
山六十里頭入渭水尾達樊川土赤不毛隋以長安
狹小改作新都於龍首山遷焉在今西安府城北十
里禹貢五百里甸服百里賦納總二百里納鉅三百
里納粘服四百里粟五百里米五百里侯服百里采
二百里男邦三百里諸侯註甸服畿內之地甸田服
事也以皆田賦之事故謂之甸服五百里者王城之

外四面皆五百里也賦納總五甸甸服五等之事侯服者侯國之服甸服外四面又各五百里也百里采三甸侯服三等之事五緯五星也漢高入秦五星聚東井戴延之西征記關內八水一涇二渭三灞四滻五滂六潏七澧八瀉地軸見高四篇漢書齊人婁敬說禹祖曰秦地披山帶河四塞以為固卒然有急百萬之衆可立具也高帝遂都關中田肯賀上曰秦形勝之國也帶河阻山地勢便利其以下兵於諸侯辟高屋之上建瓴水也故持戟百萬秦得百二焉正義曰關中東有黃河函谷蒲津龍門合河等關南有南山及武關峽關西有大隴山關大震烏蘭等關北有黃河南塞是謂四塞之地班固西都賦離宮三十六三輔黃圖云上林有建章承光十一宮平樂觀觀二十五宮凡三十六所未央宮在西長樂宮在東桂宮明光宮在北西都賦自未央而連桂宮岑樓之高銳似山者三輔黃圖長樂宮有椒房前殿註天子之房

以椒塗壁辟除穢氣皇后所居亦然或曰取其溫或曰取椒蕃衍子孫之義也西都賦竊窵繁華更盛迭貴漢武帝兒時好戲武帝曰兒欲得婦否因指其女曰阿嬌好否帝曰若得阿嬌當以金屋貯之

三條九陌麗城隈萬戶千門平旦開複道斜通鵲觀
交衢直指鳳凰臺劍履南宮入簪纓北闕來聲名冠寰
宇文物象昭回

班固西都賦披三條之廣路立十二之通門周禮國
方九里旁三門每門為大路故曰三條又云九市開
場貨別隧分即所謂九陌也又云張千門而立萬戶
漢武作建章宮千門萬戶複道為甬道中行外不見
也周昭王時脩塗園獻丹鵲一雌一雄孟夏取鵲鵠
為扇一名條融一名反影漢武取以名觀鳳凰臺見

蕩子篇三代時佩玉秦始皇令人帶劍上殿去劍復惟賜乃得用之漢高賜蕭何劍履上殿入朝不趨是也漢光武圖二十八將於南宮雲臺此在洛陽者西都亦有之也簪纓功臣之冠其上有纓以別羣臣褰宇猶言宇宙詩雲漢篇倬彼雲漢昭回于天一統志云鵲觀在甘泉宮今西安府涇陽縣西北百二十里甘泉山上本秦林光宮漢武增廣之又名雲陽宮內有竹宮壽宮迎風觀及鵲觀

鉤陳肅蘭祀璧沼浮槐市銅羽應風迴金莖承露起校文天祿閣習戰昆明水朱邸抗平臺黃扉通戚里

西都賦周以鉤陳之位衛以嚴更之署註鉤陳紫宮外星宮衛之位象之祀堂廉也書顧命四人恭弁執戈上刃夾兩階祀蘭祀猶所謂蘭臺也或曰階廉滑利如蘭葉也璧沼即璧池也漢元始中起明堂辟雍

為博士舍列槐樹數行諸生每朔望各持方物交易
號曰槐市史記漢武元狩二年作蜚廉桂觀音義曰
蜚廉神禽也能致風氣晉灼曰蜚廉身如鹿頭如雀
有角而蛇尾豹文漢武以銅鑄象置觀上因名蜚廉
觀桂觀即桂宮三輔黃圖云二觀俱在長安城中近
北宮金莖桐柱也西都賦抗仙掌以承露擢雙立之
金莖三輔故事云元鼎二年春作栢梁臺承露盤盤
高二十丈大七圓以銅為之上有銅仙人銅手掌捧
銅盤玉杯以承雲表之清露和玉屑飲之云可長生
在西安府城西北二十里建章宮內神明臺上西都
賦又有天祿石渠典籍之府瑞應圖曰天祿者純靈
之獸五色光耀洞明王者道備則至漢書靈帝紀鑄
黃鍾四天祿蝦蟆註天祿獸也今南陽縣有宗資墓
旁有兩石獸其高八尺角而麟分鼠曳尾過壯大左
曰天祿右曰辟邪字皆刻膊上漢有天祿閣即因此
獸立名閣貯秘書劉向曾校書其上太乙下觀之楊

雄亦於此校書劉棻坐事誅詞連及雄王莽使收之
雄從閣上投下即此漢武通使身毒國為昆明所閉
故欲伐之以昆明有滇池方三百里於是除千夫五
大夫不欲者出馬以故更弄法皆謫令伐棘上林穿
昆明池以習水戰邸客舍也漢制王侯就封之國朝
會京師各有旅邸門皆施朱故曰朱邸抗如抗禮之
抗史記梁孝王世家大治宮室為複道自宮連屬於
平臺註臺不過高者曰平臺門上有窓者曰扉黃扉
天子之扉戚里
貴戚之里也

平臺戚里帶崇墉炊金饌玉待鳴鐘小堂綺帳三千萬
大道青樓十二重寶蓋雕鞍金絡馬蘭窓繡柱玉盤龍
綺柱璇題粉壁映鉶金鳴玉王侯盛

前漢書史玄字子叔以宣帝大母家封平臺侯食二千五百戶弟史高字子長封樂陵侯史魯字子回封將陵侯上文平臺是言宮室此連戚里言之則以外戚作意矣詩作篇其崇如墉張平子西京賦若大翁伯濁質張里之家擊鐘鼎食連騎相過鮑明遠結客少年場行擊鐘陳鼎食方駕自相求公孫卿言仙人好樓居黃帝時為十二樓以候神人武帝乃作蜚廉觀十二樓鮑明遠詩鳳樓十二重四戶八綺窓綉栢金蓮花桂柱玉盤龍註綉柱柱衣綉作黃鵠文楊子雲甘泉賦璇題玉英淵蛸護夔之中註題懷栢頭也皆以玉飾之

王侯貴人多近臣朝遊北里暮南隣陸賈分金將燕喜
陳遵投轄正留賓趙李經過密蕭朱交結親

左太冲詠史詩南隣擊鐘磬北里吹笙竽又阮籍咏懷北里多奇舞孝標廣絕交論陸大夫宴喜西隣郭有道人倫東國註師延紂樂師作北里之舞靡靡之樂南隣猶南陌也呂后欲王諸呂陸賈自度不能爭迺病免以好疇善地往家焉有五男乃出千金分五子令為生產賈常乘車馬歌琴侍者十人寶劍直百金與其子約曰過汝家汝給人馬酒食極飲十日而更亦如之所死家得寶劍車騎侍從者一歲中以往來他客不再過數擊鮮母久溷汝為也后因陳平燕居深念勸令交驩周勃乃以五伯金為絳侯具樂飲勃亦如之平乃以奴婢百人車馬五十乘錢五百萬為賈飲食賈以此遊漢公卿間聲名籍甚詩六月篇吉甫燕喜註謂燕飲喜樂也陳遵豪俠嗜酒閉門留客取車轄投之井中雖有急不得去阮籍咏懷詩西遊咸陽市趙李相經過顏延年註以此為漢成帝后趙飛燕婕妤好李平班史谷永傳又為趙李報德復怨

楊升菴云趙李即成帝小臣若飛燕婕妤好豈可言經過可見延年之誤劉會孟謂安知非實有此人不必求其誰何亦非也唐王維亦有日夜經過趙李家豈唐時亦實有此人乎后詩話補遺又云趙李乃何並傳陽翟輕俠趙李欵后皆為並所殺按謝靈運景隆法師誄云諒趙李之咸陽程鄭之臨卽又云孰是歡慰程鄭趙李以趙李對程鄭則趙李非一人且谷永傳云成帝久無繼嗣數為微行多近幸小臣趙李從微賤專寵皆皇太后與諸舅夙夜所常憂按此傳當以小臣為句不可以趙李為小臣也升菴詆願劉之博不免有失而其誤自蹈之甚矣考據之難矣味谷永傳趙李似指飛燕平二家平既立為婕妤好上曰始衛皇后亦從微起乃賜姓衛平班婕妤好所進侍者也在飛燕未幸前蕭育朱博為友著聞當代時人為之語曰蕭朱結綬王貢彈冠后蕭朱有隙不終故王丹曰蕭朱隙其末

丹鳳朱城白日暮青牛細憶紅塵度俠客珠彈垂楊道
倡婦銀鈎採桑路

魏武與楊彪書今贈足下四望通憶七香車二乘青
牛特二頭籍田賦微風生於輕憶兮纖埃起於朱輪
潘尼迎大駕詩歸雲乘憶浮淒風尋帷入梁簡文春
日想上林詩香車雲母憶馱馬黃金羈又傷離詩明
香翌還憶清笳送後塵註憶車上帳也所以禦熱如
今之幃細色也班固西都賦紅塵四合烟雲相連陳
易繒俠客控絕影詩仙掌層臺浮麗日長楸廣路起
紅塵俠客見送鄭少府入遼篇珠彈見之問篇此言
其侈如所謂金丸也潘岳美安儀詞藻絕麗尤善哀
誄之文少時嘗挾彈出洛陽道婦人遇之皆連手縈
繞投之以果滿車而歸枚乘梁王兔園賦若乃大郊
采桑之婦人兮桂陽繒紆連袖方路鈎采桑籠鈎也

以銀為之采桑
路又即見下文

倡家桃李自芳菲
京華遊俠盛輕肥
延年女弟雙飛入
羅敷使君千騎歸
同心結縷帶連理
織成衣春朝桂樽
樽百味秋夜蘭燈
燈九微翠幌珠簾
不獨映清歌寶瑟
自相依且論二十八
年是寧知四十九
年非

李夫人得幸漢武帝弟延年亦大幸時人為之語曰
一雌共一雄雙飛入紫宮邯鄲有女子名羅敷適邑
人十乘王仁后為趙王家令羅敷出采桑趙王悅而
欲奪之羅敷乃彈箏作陌上桑之曲以自明曰日出
東南隅照我秦氏樓秦氏有好女自名為羅敷羅敷
善采桑採桑城南隅青絲為籠繩桂枝為籠鉤觀者

見羅敷下擔採鬢鬢少年見羅敷脫巾着綃頭耕者
忘其耕鋤者忘其鋤使君從南來五馬立踟躕羅敷
年幾何二十尚未滿十五頗有餘使君謝羅敷寧可
共載否羅敷亦致辭使君一何愚使君自有婦羅敷
自有夫東方千餘騎夫婿居上頭同心結以五色為
結同心而下垂者曰同心結如今之流蘇也古人皆
以此相贈以見親狎之意隋煬帝父文帝方崩之夕
封小金合遣賜文帝陳夫人夫人以為鴛鴦甚發之
乃同心結也其夜炆馬連理見久戌遣城篇連理帳
註九微見有懷京邑篇幌書帳也蓮伯玉行年五十
而知四十九年之非又
見詠懷上裴侍郎篇

古來榮利若浮雲人生倚伏信難分始見田實相移奪
俄聞衛霍有功勲未厭金陵氣先開石櫨文朱門無復

張公子霸陵誰畏李將軍

倚伏見邐夜有懷篇曹據感舊詩富貴他人合貧賤
親戚離廉簡門易軌田實相奪移晨風集茂林栖鳥
去枯枝註田蚡漢景帝后同母弟實嬰漢文帝后從
兄子也嬰為將軍時蚡未貴跪起如子姪孝景末蚡
益貴幸新欲用事卑下賓客進名士貴之欲以傾嬰
后因灌夫罵坐蚡收之嬰救夫不得夫遂告蚡陰事
蚡因言嬰短嬰卒坐棄市衛青漢武衛后同母弟伐
匈奴有功霍去病衛青姊子霍光兄也后青無功不
得益封而去病日貴門下多去事去病輒得官爵金
陵見宿山莊篇衛靈公卒葬沙邱宮穿冢得石槨有
銘云不憑其子靈公奪我里子韋曰靈公之為靈也
久矣又見樂大夫挽詞開白日註漢成帝徵行自稱
富平侯張放家人時有童謡曰燕燕尾涎涎張公子
時相見燕燕指趙飛燕也詳見后卷檄文燕啄皇孫

註霸陵李將軍
見別李嶠詩

相顧百齡皆有待居然萬化咸應改
桂枝芳氣已銷亡

栢梁高宴今安在

百齡桂枝見挽丹陽刺史詩栢梁臺名漢武帝太后
延神君祠之宮中至是神君求出乃營栢梁臺舍之
以香栢為梁香聞十里在長安城北關內
今在西安府城西北一十四里未央闕內

莫矜一旦擅豪華自言千載長
驕奢倏忽搏風生羽翼
須臾失浪委泥沙黃雀徒巢桂
青門遂種瓜

搏風見螢火篇戰國策莊辛諫楚王曰鄭必危矣王
獨不見黃雀俯啄白粒仰栖茂樹鼓翅奮翬自以為

與人無爭不知夫公子王孫左扶彈右攝丸以其頸
為的晝遊茂樹夕調酸醎耳青門種瓜見高四篇求

註

陵瓜

黃金消鑠素絲變一貴一賤交情見紅顏宿昔白頭新
脫粟布衣輕故人

劉休玄儼惠連詩色滋畏沃若人事亦消鑠本鄆陽
獄中上書魯聰季孫之說遂孔子宋信子舟之計四
墨翟夫以孔墨之辨不能自免讒諛而二國以危何
則衆口燦金積毀銷骨又本國語伶州鳩曰衆心成
城積毀銷骨墨子見染絲歎曰染於蒼則蒼染於黃
則黃五入之則為五色故染不可不慎非獨絲也國
亦有染湯染伊尹紂染惡來也貴賤交情見高四篇
白頭新見螢火篇公孫宏為相食故人高賀以脫粟

覆以布被賀怨曰何用故人富貴為脫粟布被我自
有之怒而去語人曰宏身服貂蟬衣麻桌內厨五鼎
外膳一般其儉詐也宏聞之
慚曰寧逢惡賓不逢故人

故人有堙淪新知無意氣灰死韓安國羅傷翟廷尉

韓安國事見螢火

翟廷尉見高四篇

已矣哉歸去來馬卿辭蜀多文藻楊雄仕漢乏良媒三
冬自矜成足用十年不調幾遭迴

歸去來見寒夜獨坐司馬相如字長卿蜀人楊雄字
子雲亦蜀人仕漢成帝官不過郎中位不過執戟后
附新莽為大夫張釋之為騎郎十
年不得調三冬足用見高四篇

汲黯新逾積孫宏閣未開誰惜長沙傳獨負洛陽才

汲黯事見春宵早行公孫宏既相於是起客館開東
閣以延賢人一日欽賢館以待大賢次曰翹才館以
待大才次曰遊士館以待國士躬自菲薄俸祿皆以
給之后李蔡嚴青翟趙周石慶繼踵丞相客館邱壘
而已至賀屈楚時壞以為馬廐庫奴婢室矣賈誼洛
陽人少有才為絳灌所疾出為長沙王太傅梁武帝
詔劉孺與張率賦詩時二人並醉未及成帝取孺手
板題戲之曰張率東南美劉孺洛陽才投筆便應就
何事若

遲回

洛陽成周地名居洛水北故曰洛陽春秋屬晉戰國
屬魏秦屬三川郡漢為河南郡治東漢都於此改洛
為雒以當火德魏復為洛陽晉因之隋遷都治河南
縣唐改洛陽為永昌尋復舊宋初河南洛陽二縣並

置金以河南縣省入洛陽縣
元仍舊金因之屬河南府

疇昔篇

少年重英俠弱歲賤衣冠既託寰中賞方承膝下歡
遊霸陵曲風月洛陽端且知無玉饌誰肯逐金丸

英俠與遊俠同見鄭少府入遼篇禮人生十年曰幼
學二十曰弱冠賤衣冠輕冠冕也寰中賞得名也膝
下歡事親也霸陵見別李嶠詩洛陽即洛陽城也東
漢舊都風月所會所謂京洛多佳麗者也玉饌見初
秋登司馬樓篇漢韓王信入匈奴至顏當城生子因
名顏當后歸漢其孽孫韓嫣得幸武帝與共卧起好
彈以金為丸一日所失十餘長安兒童聞嫣
出即競逐拾之長安語曰若飢寒逐金丸

金九玉饌盛繁華自言輕侮李倫家五陌爭馳千里馬
三條競駕七香車掩映飛軒乘落照參差步障引朝霞
池中舊水如懸鏡屋宇新粧不讓花

史記呂不韋說華陽夫人曰夫人不以繁華時樹本
阮籍詠懷昔日繁華子安陵與龍陽梁沈約三日詩
洛陽繁華子長安輕薄兒晉散騎常侍石苞之子崇
字季倫極富於財與王后之兄愷聞富競以繁華相
高輕侮謂繁華過之也五陌見帝京篇漢文帝時人
有獻千里馬者又九方皋相千里馬嘉其善走一日
千里也三條七香車俱見帝京篇王樹失舟至烏衣
國主人命飛雲軒送之令樹坐其中閉目少息須臾
至家落照日也石崇與王愷聞富愷作紫步障四十
里崇作錦步障五十里朝霞步障之色陳僧慧標詠

水詩舟如空裏
泛人似鏡中行

意氣風雲倏如昨歲月春秋屢迴薄上苑頻經柳絮飛
中園幾番梅花落當時門客今何在疇昔交遊已踈索
莫見憔悴損容儀會得高秋雲霧廓

意氣風雲見高四篇薄音博迫也如宋師未陣而薄
之薄謂周迴相迫耳柳飛花落喻富貴失時門客何
在用衛青事見挽樂大夫詩交遊踈索亦生死
程公羅之意也高秋霧廓亦與時衰謝之語

淹留坐帝鄉無事積炎涼一朝披短褐六載奉長廊賦
文慙昔馬執戟慕前楊揮戈出武帳荷筆入文昌

帝鄉見高四篇披褐見鏤雞子詩懷玉註奉長廊居廊廡下卑官也昔馬指司馬相如前揚揚雄也雄為郎中自成哀平三世不從官執戟郎中之職也韓信曰臣事項王官不過郎中位不過執戟是也潘岳誄夏侯湛執戟疲揚長沙投賈汲黯傳上嘗坐武帳中應劭曰帳幟為武士之象也孟康置兵闌五兵於帳中又見孫長史篇玉帳註

文昌隱隱皇城裏由來奕奕多才子潘陸詞鋒絡繹飛張曹翰苑縱橫起卿相未曾識王侯寧見儼徒勞倦負新何處逢知己

潘岳陸機曹植俱見帝京篇張疑張華也華字茂先文學才識名重一時為晉司空賁后命管機要后為

趙王倫所殺負薪用朱買臣事見裴侍
郎詩知已見春霽早行篇太行道註

判將運命賦窮通從來奇舛任西東不分永棄同芻狗
且復飄飄類重蓬容鬢年年異春花歲歲同榮親未盡
禮狗主欲申功

莊子天運篇孔子西遊於衛顏回問師金曰以夫子
之行為奚如師金曰惜乎而夫子其窮哉曰何也師
金曰夫芻狗之未陳也盛以篋衍巾以文繡尸祝齋
戒以將之及其已陳也行者踐其首脊蘇者取而爨
之而已將復取而盛以篋衍巾以文繡遊居寢卧其
下彼不得夢必且數昧焉今而夫子亦取先王已陳
芻狗取弟子遊居寢卧其下故伐柯於宋削迹於衛
窮於商周是非其夢耶因於陳蔡之間七日不火食

死生相與鄰是非其昧即飄飄見洛濱
對雪篇重蓬猶累蓬也見泊河曲篇

脂車秣馬辭鄉國紫轡西南吏
印轅玉壘銅梁不易攀
地角天涯眇難測鶯囀蟬吟有悲望
鴻來鴈度無音息
陽關積霧萬里昏劍閣連山千種色

詩違脂爾車又漢廣篇言秣其馬漢武令張騫因蜀
捷為發間使四道並出出驪出冉出徒出印焚皆各
行一二十里左思賦包玉壘以為宇郭璞江賦玉壘
作東別之標註玉壘山名在今成都府灌縣西北二
十九里左思蜀都賦外負銅梁於岩渠內函要害於
膏腴註銅梁山名在岩渠縣鶯蟬鴻鴈傳寫四時之
景陽關見久戍邊城篇劍閣亦山名晉張載字孟陽
至劍閣以蜀人恃險好亂因著銘以作戒曰岩岩梁

山積石我我遠屬荆衡近綴岷嶓南通邛樊北達褒斜狹過彭碣高踰萬華唯蜀之門乍固乍鎮是曰劍閣壁立千仞窮地之險極地之峻世濁則逆道清斯順在益州張敏奇之上其文武帝刻之於劍閣山在今保寧府劍州北三十里兩崖峻拔鑿石架閣而為棧道連山絕險秦司馬錯由此道伐蜀銅梁山在今合州南五里銅梁縣在州南九十里本巴國地楚襄公滅巴封其子為銅梁侯秦漢為墊江縣地長安中始置銅梁縣在今縣北列宿婁后移涪江南崖又移東溪壩元移今治并巴州縣入焉今屬合州隸重慶邛一統志云漢武平西南夷冉駹之屬皆震恐請臣置吏乃以邛都為越雋郡晉宋因之北齊謂之僕郡后周置嚴州隋改西寧州后復為雋州大業中又更越雋郡唐初復為雋州又改越雋郡至德初沒於吐蕃貞觀中收復太和中又為蒙詔所據元初置建昌路又立羅羅斯宣慰司以統之今為行都司隸四川

道楚古楚侯國為夷僚所居漢武為犍為犍為犍犍二郡
地唐為羈縻馴駉浪瀉四川總名白馬湖部屬戎州
都督宋蠻王屯湖內元置
馬湖路今改府隸四川

蜀路何悠悠岷峯阻且修迴腸隨九折迸淚忽雙流寒
光千里暮露氣二江秋長途看束馬平水見沈牛

蜀見鄭安陽篇題註岷山名在茂州羗之列焉村一
名鴻蒙即隴山之南首故稱隴蜀又名汶焦山其附
曰羊膊江水所出山高六十里望見成都修長也詩
孔修且張司馬遼報任安書是以腸一日而九迴黃
河九折故以迴腸隨之也迸亦雙也成都府有雙流
縣故以淚言之二江一名汶江一名流江經府城南
七里蜀守李冰穿二江通成都皆可行舟溉田萬頃
一由永康過新繁入成都謂之外江一由永康過郫

入成都謂之內江又名錦江史記齊桓公東馬懸車
登太行山至平耳山司馬相如上林賦沈牛塵麋平
子西京賦然後釣魴鱧鰻鮪撫紫貝搏嗜龜鼈水
豹串潛牛澤虞是濫何有春秋註潛牛沈牛也能沈
沒水中亦謂之金牛恐非指此成都河邊有鐵牛七
李冰所造今二沈于河在府城南三十五里名石犀
又四川嘉定州犍為縣南二十里有沈犀山
昔有犀牛於此山下渡江而沈后說為是

華陽舊地標神制石鏡娥眉真秀麗諸葛才雄已號龍
公孫躍馬輕稱帝五丁卓犖多奇力四士英靈用文藝
雲氣橫開八陣形橋影遙分七星勢

華陽秦之郡名秦昭襄王有華陽君苴戌又太子妃
曰華陽夫人慈湖王幼學集覽云華陽在鄭州管城

南建安馮智舒云未詳所在楊升菴云大江自滿堰至犍為有五津曰白華津萬里津江首津涉海津江南津出華陽國志上下文地名俱在成都恐即今華陽縣也峨眉即蜀峨眉山周迴千里在今嘉定州諸葛號龍見幽紫書情篇蜀都賦公孫躍馬而稱帝劉宗下輦而自王公孫述字子陽茂陵人為清水長有能名遷導江卒正治臨邛南陽宗成起兵徇漢中以應漢眾數萬人述遣使迎之成等至成都虜掠暴橫述謂郡中豪傑曰天下同苦新室思劉氏久矣故聞漢將軍到馳迎道路今百姓無辜而婦人係獲此冠賊非義兵也乃詐為漢使者拜述將軍兼益州牧擊成殺之而并其眾及更始遣李宝徇蜀漢遣其弟拒擊破走之遂自立為蜀王光武未即位已稱帝吳漢伐蜀述敗死五丁見鄭安陽篇蜀都賦蔚若相如蠭若君平王褒暉暉而秀發楊雄含章而挺生幽思綢繆德摘藻揆天庭考四海而為雋當中葉而擅名此

即四士也註三子著述皆是君平嚴遵也作老子指
歸故云用文藝八陣諸葛孔明所作凡三一在沔陽
之高平舊壘一在廣都之八陣鄉一在魚復永安宮
南江灘水上其法六十四陣天衝十六陣居兩端地
軸十二陣居中間天衝四陣居右后前衝四陣居
左地前衝六陣居后風八陣附天雲八陣附地陰遊
兵二十四陣在六十四陣之后一統志云在夔州城
南者六十四方陣法也在成都府新都縣北三十里
牟彌鎮者一百二十有八當頭陣法也在漢中府沔
縣東南一十里定軍山下者二百五十有六丁營法
也其陣聚細石為之各高五尺皆布列相當中間相
去九尺正中間南北巷悉方廣五尺各六十四聚或
為人散亂及為夏水所沒水退復如故又有二十四
聚作兩層其後每層各二十聚桓溫伐蜀經之以為
常山蛇勢七星橋
見吳七遊蜀篇

川平烟霧開遊戲錦城隈
墉高龜望出水淨鴈文迴
尋妹入酒肆訪客上琴臺
不識金貂重偏惜玉山頽

成都記錦里城呼為錦城以江山明麗錯雜如錦張
儀築成都大城屢頽忽有大龜出於江儀以問巫巫
曰隨龜築之果就功遂名龜城一名龜化衡山有迴
鴈峯鴈至此不得過迴豈而返詩靜女其妹註美也
琴臺見鄭安陽篇阮孚字遙德為常侍以金貂換酒
為有司所彈晉元帝省之字咸子也玉山頽見紫雲
觀贈道士篇

他鄉冉冉消年月帝里沈沈恨城闕不見猿聲助客啼
唯聞旅思將華發我家迢遞關山裏關山迢迢不可越

故園梅柳尚餘條春來勿使芳菲歇

楚詞老冉冉而將至兮恐脩名之不立司馬彪贈山
濤詩冉冉三光馳逝者一何速陸機出西城詩靡靡
年時改冉冉無已及註皆云漸進貌或作往冉冉義同
猿聲見鄭安陽篇斷猿註關山見蕩子從軍賦楚詞
芳草歇而不披潘岳悼亡詩流芳未及歇遺挂猶在
壁謝靈運詩首夏猶清和芳草亦未歇芳菲見蕩子
篇靡蕪註
歇止也

解袂欲言歸執袂愴多違北梁俱握手南浦共沾衣別
情傷去蓋離念惜光輝捐鄉有何記木落鴈南飛

李陵別蘇武詩携手上河梁遊子暮何之徘徊岐路
側悵悵不能辭南浦見之間篇去蓋用傾蓋字捐鄉

離鄉上也漢武秋風辭秋風起兮白雲飛草木黃落兮鴈南歸蘭有秀兮菊有芳懷佳人兮不能忘

飛鳥轉南陸春來酒應熟相將云閣望青溪且用藤盃泛黃菊十年不調為貧賤百日屢遷隨倚伏祇為須求負郭田使我再干州郡祿

南陸見詠蟬篇西陸註云草葉香可以辟蠹云閣藏書之閣也一云當作菌閣楚辭菌閣兮蕙樓謝元暉詩尋雲陟紫樹隨山望菌閣註菌香草也或曰連菌之義青溪見高四篇十年不調見帝京篇蔡邕亡命江海積十二年董卓聞其名而辟之稱疾不就卓怒罵曰我能族人邕懼應命到署祭酒甚見敬重三月之間周歷三臺遷為侍中及王允誅卓邕驚歎允收殺之倚伏見遷夜有懷詩蘇秦曰使我有洛陽田二

頃安能佩六國相印梁劉孝標與

宋元思書囿空桑麻田無負郭

百年鬱鬱少騰遷萬里迢迢入鏡川
涖江沸潮衝白霧淮海長波接遠天
叢竹眠朝露孤山起暝烟賴有邊城
月常伴故人懸

漢高謂蕭何曰吾亦欲東耳安能鬱鬱久居此乎鏡
川即上文水如懸鏡之意詩所謂伊人在水之涖註
水涯也

東南美箭稱吳會名都隱軫三江外
塗山執玉應昌期曲水開襟重文會
仙鏞流音鳴鶴嶺寶劍分輝若蛟瀨

未看白馬對蘆芻且覺浮雲似車蓋

史記東南之美者有會稽之竹箭焉吳虞翻與少府孔融書并示以所著易註融答書曰聞延陵之理樂觀吾子之論易乃知東南之美者非徒會稽之竹箭也吳會見白雲抱幽石篇三江見冬日野望篇大禹會諸侯於塗山執玉帛者萬國晉武嘗問摯虞三月三日曲水之義虞對曰漢章帝時平康徐肇以三月初三生女至三日俱亡村人以為惟乃招携之水濱洗祓遂因水以泛觴東晉進曰虞小生不足以知昔周公成洛邑因流水以汎酒故逸詩云羽觴隨波又秦昭王以三日置酒河曲見金人捧水心之劍曰令君制有西夏乃霸諸侯因此立為曲水二漢相緣皆為盛集也王羲之蘭亭序言言其地有崇山峻嶺茂林脩竹因以為曲水流觴諸賢畢集即開襟文會之事也馬卿曰鏘鳴鶴取在陰之義見王明府叅選篇

吳都賦控清引濁混濤并瀨註水淺而急曰瀨若蛟
瀨取化劍之義也蘆芻所以醺酒杜詩黃羊飯不羶
蘆酒筍為筒註吸而飲之若今之咂酒也又名鈎藤
酒又疑當作壚騶南史齊謝幾卿性通脫會意便行
不拘朝憲嘗預樂遊苑宴不得醉而還因詣道邊酒
壚停車寧幔與車前二騶對飲時觀者如堵卿處之
自若漢明帝於東都城外立精舍以處攝摩騰竺法
蘭為白馬寺騰以白馬馳經初止鴻臚寺故云浮雲
似車蓋見紫雲觀篇圖經所載塗山者四一會稽一
渝州一濠州一當塗禹娶塗山在今鳳陽府懷遠縣
東八里與荆山對峙此山西南有禹墟及禹會村鯀
廟在馬東坡塗山詩樵鯀已入黃熊廟烏鵲猶朝禹
會村指鯀化黃熊
乃濠州塗山也

江南節序多文酒屢經過共踏春江曲俱唱采菱歌舟

移疑入鏡棹舉若乘波風光無限極歸楫礙池荷

謝靈運憶山中詩采菱調易急江南歌不緩楚人心
昔絕越客腸今斷註采菱江南俱曲名庾信有哀江
南賦事見下章張協七命淵若唱淮南之曲榜人奏
采菱之歌歌曰乘鳧舟兮為水嬉臨芳洲兮拔雲芝
陳釋慧標詠水曾添疎勒井經涌貳師營玉津花
色亮銀溪錦磧明舟如空裏泛人似鏡中行持將符
上善利得勤高情

眺聽烟霞正流盼即從王事歸艫轉芝田花發屢徘徊
金谷佳期重遊衍登高南適嗤梁叟馮軾西征想潘掾
峯開華岳聳疑蓮水激龍門急如箭

艦見久戍邊城篇東方朔曰西王母乘靈光輦適東
王公之舍稅步景馬遊於芝田食芝田之草註方丈
山有數十萬頃田種芝草課計頃畝如種稻狀石崇
金谷序曰余以元康之年從太僕卿出為使持節監
青徐諸軍事征虜將軍有別廬在河南縣界金谷澗
中或高或下有清泉茂林衆果竹植藥草之屬莫不
畢備又有水碓魚池土窟其為娛目歡心之物備矣
時征西大將軍祭酒王翔當還長安余與衆賓共往
澗中晝夜遊宴屢遷共坐或登高臨下或列坐水次
時琴瑟笙筑合載車中道路並作及住令鼓吹迭奏
遂各賦詩以叙中懷或不能者罰酒三斗感性命之
不永俱凋落之無期故列序詩人官號姓名年紀又
寓詩著后后之好事者其覽之哉德明即明德賢人
也梁庾信字子山因侯景亂臺城奔江陵元帝承制
除為御史中丞聘西魏屬大將南討留長安累遷開
府儀同三司后南北通好流寓各許還國惟信與王

裴措不造信嘗有鄉關之思作哀江南賦有云霸陵
夜獵猶是舊時將軍咸陽布衣非獨思歸王子潘據
即潘岳也作西征賦云歲次元禔月旅懿賓丙子統
日乙未御辰潘子憑軾西征自京徂秦註左傳楚子
玉謂晉侯曰請與君之士戲君憑軾而觀之陸機狹
斜行鳴玉豈樸儒憑軾皆俊民太華山峯如蓮華故
名太華龍門水急如箭見晚泊河曲篇金谷在河南
府城西十三里地有金水自太白源南流經此谷一
名梓澤傍有清源
臺即綠珠墜樓處

人事謝光陰俄遭霜露侵偷存七尺影分沒九泉深窮
途行泣玉憤路未藏金如荼徒有嘆懷橘獨傷心

淮南子吾生也有七尺之形吾死也有一棺之土陸
機挽歌昔為七尺軀今成灰與塵九泉見挽舟陽刺

史詩窮路見早發諸暨詩泣玉見贈之間篇詩谷風篇誰謂荼苦其甘如薺註婦人言已為夫所棄其苦有甚於荼故視荼如薺之甘菜也又漢書刑法志法繁秋荼懷橘見早發諸暨橘性註又陸績七歲謁袁術懷橘數枚解術墮地術曰陸郎作客而懷橘乎績曰欲歸遺母術大奇之

年來歲去成消鑠懷抱心期成寥落挂冠裂冕已辭榮
南畝東臯事耕鑿賓階客院常疎散蓬徑柴扉終寂寞
自有林泉堪隱棲何必山中事邱壑

王莽殺其子宇滅中山孝王后家殺敬武公主及沁鄉侯何武故司隸鮑宣等數伯人北海逢萌謂友人曰三綱絕矣不去禍將及人即解冠挂東都城門歸將家屬浮海客於遼東詩大田篇俶載南畝陶淵明

歸去來辭登東臯以舒嘯亮時有老人含哺鼓腹擊壤而歌曰日出而作日入而息耕田而食鑿井而飲帝力何有於我邱壑見秋
日山行篇邱中一經註

我住青門外家臨素滻濱遙瞻丹鳳闕斜望黑龍津荒
津通獵騎窮巷抵樵輪時有桃源客來訪竹林人

青門見高四篇東陵瓜註滻水名在今西安府城東十五里源出藍田縣合金谷水北流入灞丹鳳闕見帝京篇黑龍水名淮南子女媧煉五色石以補蒼天斷鰲足以立四極殺黑龍以濟冀州積蘆灰以止淫

水桃源見酬高元上人
詩竹林見錢駱四詩

昨夜琴聲奏悲調旭旦含嘖不成笑果乘驄馬發驚詩

復道郎官稟綸誥治長非罪曾縲紲長孺然灰也經溺
高門有閣不圖封峻筆無聞欲敷妙

詩苦葉篇旭日始旦註旭日初出貌韓昭侯曰吾聞
明主愛一嘖一笑莊子西施拊心而嘖註感眉也
馬見幽繫書情詩綸誥禮緇衣篇王言如絲其出如
綸詳見三卷上康使啓龍綍註公治非罪長孺然灰
俱見螢
火賦篇

適離京兆謗還從御府彈炎威資夏景平曲況秋翰畫
地終難入書空自不安吹毛未可待搖尾且求殮

京兆尹張敞為妻畫眉都人稱京兆眉撫為御府所
彈帝聞而問之敞對曰閨門之內夫婦之私猶有過

於此者漢宣頗用法令路溫舒上尚德緩刑書諺云
畫地為獄議不入刻木為吏期不對此皆疾吏之風
悲痛之詞也晉殷浩連年北伐師徒屢敗糧械俱盡
桓溫因朝野之怨上疏廢為庶人自此大權悉歸於
溫浩與溫齊名而心競不相下溫嘗輕之浩既廢黜
雖愁怨不形詞色嘗書空作咄咄怪事四字吹毛求
疵謂求細過於毛髮之間
也搖尾見幽繫書情篇

大夫坎壈多愁疾契濶屯遭盡今日慎罰寧憑兩造詞
嚴科直挂三章律鄒衍街街悲衝燕獄李斯抱怨拘秦格
不應白髮頰成綵直為黃沙暗如漆

坎壈見裴侍郎詩詩擊鼓篇死生契濶註隔遠之意
易屯之上六屯如遭如乘馬班如泣血連如書康誥

惟乃丕顯考文王克明德慎罰呂刑兩造具備師聽
五詞註兩造兩爭者皆至也周官以兩造聽民訟具
備詞證皆在也師衆也五辭麗於五刑之辭也漢高
入關悉除秦苛禁與民約法三章曰殺人者死傷人
及盜抵罪餘不問鄉衍燕人下獄剖胃而死秦相斯
為趙高所誣父子相哭曰吾復欲與汝牽黃犬上東
門逐狡兔得乎遂夷
三族三族秦格也

紫禁終難叫朱門不易排驚魂聞葉落危魄逐輪埋霜
威遙有勵雪衽更無階含冤欲誰道飲氣獨居懷

紫禁難叫所謂叫天閭於九重者也字出楚詞見後
封禪表魯褒錢神論無德而尊無勢而熱排金門入
紫闥驚魂聞葉落見螢火賦漢和帝分遣八使巡行
天下張網獨埋其車輪於洛陽都亭曰豺狼當道安

問狐狸遂効奏梁真無君之心十五事云危魄者言已之魄又影輪消桂魄之意也雪衽如雪耻之雪

忽聞驛使發關東傳道天波萬里通
涸鱗去轍先遊海
幽禽釋網便翔空舜澤堯曦方有極
讒言巧佞儻無窮
誰能跼蹐依三輔會就商山訪四翁

涸鱗見春齊早行詩堯曦猶堯日也日色曰曦詩小雅正月篇謂山蓋高不敢不跼謂地蓋厚不敢不跼
跼曲背踏累足也三輔見送陳文林篇四翁即四皓見梁大官篇

行軍軍中行路難

行路難古曲名
見發諸暨詩註

君不見封狐雄虺自成羣馮深負固結妖氛玉璽分兵
徵惡少金壇授律動將軍

楚辭招魂篇封狐千里雄虺九首註封狐大狐也健
走千里求食也虺亦蛇也九首一身九頭也引此以
喻匈奴猶左氏言封豕長蛇耳史記漢武徵行上林
苑中惡少年欲攻之又徵惡少為兵金壇見和孫長
史篇

將軍擁旄宣廟畧戰士橫戈靜夷落長驅一息背銅梁
直指三危登劍閣

銅梁劍閣
見疇昔篇

閣道迢遙起戍樓
劍門遙裔俯靈邱
卬關九折無平路
江水雙源有急流

諸葛亮治卬閣息民休士三年而後用之註蜀中道險高深谿谷皆架木為棧道構閣以通往來謂之棧閣劍門見鄭安陽入蜀篇卬關九折見費六還蜀篇雙源見之間篇

征役無期返他鄉
歲月晚杳杳
邱陵出蒼蒼
林薄遠途危
紫蓋峯路澁青泥坂

湖廣衡州府衡山縣西三十里有衡山寨字記云宿當翼軫度應機衡其山盤繞八百里有十二峯十洞十五巖三十八泉二十五溪九池九潭九井而峯之最大者五曰祝融紫蓋雲密石廩天柱唯祝融最高

紫蓋峯每見雙白鶴迴翔其上青泥坂在今平陽府
蒲州東南十五里仲條山伯樂逢驥驥困鹽車處俗
名青石槽亦謂之虞坂宋沈田子由武關進屯青泥
即此又陝西漢中府畧陽縣西北一百五十里有青
泥嶺雨過多泥淖宋陽粹中題青泥驛詩山
猶連蜀道人已作秦音未知是何青泥坂也

去去指危牢行行入不毛絕壁千里險連山四望高

行行見幽繁書情篇驄馬註諸葛孔明出師
表五月渡瀘深入不毛四望見送之問篇

中外分區宇夷夏殊風土交趾枕南荒昆彌臨北戶川
源饒毒霧溪谷多淫雨行潦四時流崩崖千歲古

交趾南夷地昆彌北狄酋名漢武以江都王建安細
君為公主妻烏孫昆莫以為夫人公主自治宮室居

歲時一再與昆莫會昆莫年老言語不通公主悲愁
思歸作黃鵠之歌天子憐之使人問遺昆莫死其孫
岑娶又妻公主代立為昆彌註昆彌王
號也岑娶娶公主公主上書詔許之

漂梗飛蓬不暫安捫藤引葛陟危巒昔時聞道從軍樂
今日方知行路難

漂梗見浮查篇飛蓬見泊河曲篇王仲宣從軍詩從
軍有苦樂但問所從誰所從神且武馬得久勞師古
樂府左延年從軍詩從軍何等樂一
驅乘雙馭鞍馬照人白龍驤自動作

滄江綠水東流駛炎洲丹徼南中地南中斗映星河
秦關秦塞阻烟波三春邊地風光少五月瀘中瘴癘多

朝驅疲斥堠夕息倦樵歌向月彎繁弱連星轉太阿

賦見晚愁田家篇一作賦與快同見魏志百陽雜俎
河水色渾賦流尸子黃河下龍門其流賦竹箭元好
問詩賦雨東南來趙松雪有賦雪帖字音決賦驥名
馬也生七日起其毋炎洲見遠使海曲篇環海註丹
微見蕩子篇馬謖謂孔明曰南中恃其險遠不服久
矣今雲南等州之地是也瀘水名孔明出師表五月
渡瀘非今瀘州乃古之江陽水今名金沙江即黑水
也故以盧名沈黎古志孔明南征由今黎州路四百
餘里至兩林蠻自西林南琵琶部三程至雋州十程
至瀘水四程至弄棟即姚州也今金沙江在滇蜀之
交一在武定府之江驛一在姚安之左却孔明所渡
即左却琵琶地一作風琵琶兩林今邛部長官司斥堠
巡警之處斥柝也堠候也夜則擊柝日則伺候以警
盜賊候有墩臺故或從土也左傳周公相王室以君

天下於周為睦分魯公以大路大旂夏后氏之璜封父之繁弱註封父古諸侯繁弱大弓也上林賦彎繁弱滿白羽寶劍有九惟韓為衆一日棠谿二曰墨陽三曰合伯史記作合賻春秋后語作合相四曰鄧師五日宛馮六曰龍泉七曰太阿八曰莫邪九曰干將莫邪十將匠名餘皆以韓地名之蘇秦曰韓卒之劍戟皆出於冥山棠谿墨陽合賻鄧師宛馮龍淵太阿皆陸斷牛馬水截鵲鴈連星即連牛也見螢火賦劍

影埋
豐註

重義輕生懷一顧東征西伐凡幾度夜夜朝朝斑鬢新年年歲歲戎衣故

一顧見宋之間篇又烈女傳鄭子瞽者楚成王之大人也成王登臺子瞽不顧王曰顧吾與汝千金遂行

不顧曹植所謂一傾千金重何必珠玉賤也

故人霸城隅遊子滇池水天涯望轉遙地際行無已徒覺炎涼節忽復離寒暑物華非不知關山千萬里

霸城見早發諸暨註滇池在雲南城南一名昆明池廣五百里史記滇原廣末狹似倒流故云滇詳見帝京篇古詩行行重行行與君生別離相去萬里餘各在天一涯東邊曰垂西邊曰際梁柳惲贈吳筠詩離念已鬱陶物華復如此

棄置勿重陳征行多苦辛且悅清茄梅柳曲詎憶芳園桃李人

茄見蕩子篇梅柳曲名張騫入西域傳茄曲西京唯
德摩訶兜勒二曲李延年因胡曲更造新聲二十八
解乘興以為武樂後漢以給邊將和帝時萬人將軍
用之魏晉以來唯存黃鶴隴頭出塞入塞於楊柳黃
單子赤之楊望行人一十四
曲蔡邕益琴為九絃彈之

絳節紅旗分白羽丹心白刃酬明主但令一被君王知
誰憚三邊征戰苦

絳赤色節以旄牛尾結絡成節注於旗竿之上蘇武
卧起持漢節旄旄盡落是也其制本於武王牧野之
誓右秉白旄以麾後人因執以為信興兵及使外國
皆用之古者節長一尺二寸秦漢以下改為旌幢之
形後世漸長數尺釋名以為節毛上下相重取象竹
節亦以示人臣盡節操之義唐以後藩鎮皆授節鉞

白羽扇也見遶城落日篇
上文所引滿白羽乃箭也

行路難幾千端無復歸雲憑短翰空餘望日想長安

平子思元賦憑歸而遐逝芳夕余宿乎扶桑潘岳陳
舊賦仰晞歸雲傳毅七檄仰歸雲邈遊緘李克詩來
若迅風散逝為歸雲征短翰見送
問五官詩望日長安見高四篇

艷情代郭氏荅盧照鄰

照鄰字昇之范陽人十歲從曹憲王義方授蒼
雅調鄧王府典籤王謂人曰此吾之相如調新
都尉病棄官居大白山餌方士元明膏會父喪
號嘔丹輒出由是疾甚客東龍門山手足俱廢
自以高宗尚吏已獨儒武后尚法已黃老
后封嵩山求賢已廢疾作五悲赴水死

迢迢芊路望芝田
眇眇函關恨蜀川
歸雲已落涪江外
還鴈應過洛水瀍

謝靈運江中贈詩可憐誰家婦綠流洗素足明月在雲間迢迢不可得註迢迢遠也芊草盛貌陸機文賦清麗芊眠註光色盛貌一作裕綿望山谷青裕裕也見說文轉作芊綿韋莊詩可憐芳草更芊眠芝田見時昔篇眇眇亦遠也遠視不明曰眇函關函谷關也秦時在靈寶縣左右絕崖十丈中僅容一車漢將軍楊僕耻為關外人移新安縣東一里蜀見費六題註蜀川指曠野之地萬夫之川非指水也歸雲見行路難篇涪江在重慶府巴縣水流東南合梓州之射江還鴈用蘇武事見蕩子篇瀍水名源出河南府洛陽縣穀城山東流入洛處為偃師縣書洛誥我乃卜澗水東瀍水西惟洛食瀍水近洛故云洛水瀍也禹貢

伊洛渥澗亦以渥近洛言之
東京賦沂洛背河左伊右渥

洛水傍連帝城側帝宅層甍垂鳳翼銅駝路上柳千條

金谷園中花幾色

洛陽舊城始築於周公卜澗水東渥水西為王城周
亡秦以十萬戶封呂不韋復增廣之東漢魏西晉元
魏皆都於此隋煬帝大業元年大營東京名曰新都
唐太宗欲復修之為張元素諫止故云帝城也洛陽
縣志洛水南去縣治二里源出洛陽縣冢嶺山東流
經本縣至成皋入河故曰傍連國語宰周公曰譬之
如室既鎮其甍矣人何加焉劉休元擬張協詩水鶴
巢層甍山雲潤柱礎註甍棟也層上下相承也簷阿
連於棟上華采軒翔如垂鳳翼也銅駝始皇所鑄舊
在長安宮城西門外魏明帝自長安徙至洛陽宮門

前晉惠帝時關內侯索靖知天下將亂指銅駝曰會
見爾在荆棘中至晉成帝二年趙王石虎徙於鄴晉
武大元六年符堅復還長安五胡志符堅滅燕趙
后自長安至諸州皆夾道樹槐柳二十里一亭四十
里一驛行者取給於途百姓歌之曰長安大街夾樹
楊槐下走朱輪上有鸞栖英彥雲集誨我萌黎蕭子
顯春別詩翻鶯度燕雙比翼楊
柳千條共一色金谷見晴昔篇

柳葉園花處處新洛陽桃李應芳春妾向雙流窺石鏡
君住三川守玉人

成都府有雙流縣石鏡見晴昔篇三月見途中有懷
詩註衛玠美風神乘車過洛陽市見者以為玉人雙
流本漢蜀郡廣都縣地晉置寧蜀郡后周郡廢隋初
改廣都為雙流縣取二江雙流為名唐復於此置廣

都縣至元省廣都八馬今仍
舊在成都府西南四十里

此時離別那堪道此日空林對芳沼芳沼徒遊比目魚

幽徑還生拔心草

空林見蕩子篇題註爾雅比目魚以左右分不比不
行又云卷施草拔心不死郭璞卷施贊卷施之草拔
心不死屈平嘉之諷詠以此取類雖通興有遠邇梁
王僧孺贈顧倉曹詩夙昔今何在生平棄不論譬如
卷施草心謝葉空存註南越志寧鄉縣草名卷施拔
心不死江淮間謂之宿莽又見至汾水戍篇宿莽註
劉希洛陽公子行詞此日遨遊邀美女此時歌舞入
娼家娼家美女鬱金香老去飛來公子傍詩意與此
相似

流風迴雪倘嫵媚驥子魚文實可憐擲果河陽君有分
貨酒成都妾亦然

曹子建洛川神賦髣髴兮若輕雲之蔽月飄颻兮若
流風之迴雪章華賦彤嫵媚以嬋媛兮若流風之靡
草左思蜀都賦若夫王孫之屬郤公之倫從禽于外
巷無居人並乘驥子俱服魚文註桓譚新論善馬者
曰薛公得馬惡貌而正走名驥子魚獸名似猪東海
有之其皮背上斑文腹下純青可為弓韉矢服潘岳
美姿儀詞藻絕麗尤善哀詠之文少時嘗扶彈出洛
陽道婦人遇之皆連手縈繞投之以果遂滿車而歸
卓文君既奔相如與之成都賣酒文君當壚相如穿
犢鼻祝滌器於市文君父卓王孫耻之與錢百萬遂
之長安因楊意見武帝以詞賦得
幸仕至大中大夫竟以病消渴死

莫言貧賤無人重莫言富貴應須種綠珠猶得石崇憐
飛燕曾經漢皇寵

史記陳勝曰王侯將相寧有種乎綠珠石崇愛妾崇
使交趾以珍珠一斛買之後趙王倫嬖人孫秀求之
不與誣崇為亂使收之崇謂綠珠曰我因汝得罪綠
珠自投樓下而死飛燕本長安宮人初生不舉三日
不死乃收養之及壯屬陽阿主家學歌舞體輕能呈
掌上之舞故號飛燕成帝微行過主家見而說之召
入大幸有女弟復召入俱為嬖
好貴傾后宮飛燕竟立為后

良人何處醉縱橫直如循默守空名倒持新練成慊慊
翻將故劍作平平離前吉夢成蘭兆別後啼痕上竹生

陸機為陸思遠婦作詩雖為三載婦顧影愧虛名新
練見蕩子篇題註梁蕭子雲春思詩詎能憐故素終
為泣新練曹植九愁賦愁慊慊而繼懷恒慊慊而情
挽梁王僧孺擬上山採靡蕪詩迴持昔懷慊變作今
悠悠梁元帝送西歸內人詩昔時懷慊慊愁應去今日
勞勞長別人魏文燕歌行念君客遊多思腸懷慊思
歸戀故鄉漢宣帝徵時娶許廣漢女後即帝位將立
后公卿皆心議霍光女未有所言帝乃詔求徵時故
劍大臣知指白立許倖行為后鄭文公有賤妾曰燕
信夢天使與已蘭曰余為伯儵余而祖也以是為而
子以蘭有國香人服媚之如是既而文公見之與之
蘭而御之辭曰妾不才幸而有子將不信敢徵蘭乎
公曰諾生穆公名之曰蘭后穆公有疾曰蘭死吾其
死乎吾所以生也刈蘭而卒舜崩二妃泣之泪竹成
班遂為班竹今湖廣永州府道州南
五十里有班竹巖相傳二妃泣舜處

別日分明相約束已取宜家成誠勗當時擬弄掌中珠
豈謂先摧庭際玉悲鳴五里無人問腸斷三聲為誰續
思君欲坐望夫臺端居懶聽將雛曲

馬梵賀人生子曰欣得掌上之珠王導謂謝安曰子
弟亦何預人事而欲其佳曰如芝蘭玉樹欲使其生
於庭階耳楊虞卿過小妓英墓云別我已為泉下土
思君猶如掌中珠則不惟以子言之也悲鳴二句見
鄭安陽入蜀篇斷猿註望夫臺在塞外俗言王昭君
所築庾信枯樹賦將雛集鳳比翼巢鸞臨風亭而淚
鶴對月峽而吟猿成公綏嘯賦又似鴻鴈之將雛羣
鳴號乎沙漠潘岳笙賦含胡譚諧雍雍喈喈若羣雛
之從母也陳張正得梧桐棲威鳳詩丹山下威鳳來
集帝梧中欲舞春花落將飛秋葉空影照龍門水聲

八洞庭風別有將
雖曲翻更合絃桐

沈沈落日向山低
簷前歸燕並頭棲
抱膝當窓看夕兔
側耳空房聽曉雞
舞蝶臨階祇自舞
啼鳥逢人亦助啼

劉孝綽詩誰能對雙燕
暝暝守空牀
莎雞一名促織
一名夕兔
古樂府野雞毛羽好不如家雞
能報曉新人雖如花不如舊人能續
麻梁庾肩吾冬曉詩隣雞聲已傳
愁人竟不眠曹子建棄婦篇石榴植
前庭綠葉搖標青丹華灼烈烈
耀彩有光榮光好燁流離可
以處淑靈有鳥飛來集
拊翼以悲鳴悲鳴夫何為丹
華實不成拊心長嘆息
無子當歸寧有子月經天無
子若流星天月相終始
流星沒無精栖遲失所宜
下與瓦石並憂懷從中來
嘆息通雞鳴反側不能寐
逍遙於前庭此詩甚似此二段
雞音崔上聲光明也

獨坐傷孤枕春來悲更甚娥眉山上月如眉濯錦江中

霞似錦

娥眉見時昔篇濯錦江
見送陳文林錦水註

錦字迴文欲贈君劍壁層峯自亂紛平江淼淼分清浦
長路悠悠間白雲

臧榮緒晉書賈滔妻蘇氏善屬文符堅時滔刺秦州
被徙流沙蘇氏思之織錦為迴文詩寄滔循環宛轉
讀之辭甚凄切劍壁即劍門見軍中行路難篇白雲
見高四篇迴文詩云仁聖懷德聖虞唐真妙妙顯重
榮章臣賢惟聖配英皇倫足離飄浮江湘津河隔塞
殊山梁民士感曠怨路長身微閑已處幽房人賤為

女有柔剛親所懷想思誰望純清志潔齊冰霜新故
或億殊面牆春陽熙茂雕蘭芳琴清流楚激茲商奏
曲發聲悲摧藏音和詠思
惟空堂心憂增慕懷慘傷

也知京洛多佳麗也知山岫遙虧蔽無那短封即踈索
不枉長情守期契

曹植名都篇名都多妖女京洛出少年韓非子佳麗
也者邪道之分也戰國策宮中佳麗好玩又云趙天
下善為音佳麗人之所出也嚴安疏佳麗珍恠順于
耳目謝元暉鼓吹曲江南佳麗地金陵帝王州逶迤
帶綠水迢遞起朱樓曹植贈丁儀詩壯哉帝王居佳
麗殊百城梁劉孝綽古意詩燕趙多佳麗白日照紅
粧簡文洛陽道詩洛陽佳麗所沈約詩洛陽大道中
佳麗實難比踈索猶蕭瑟也梁蕭子雲詩綠楊垂長

溪便橋限清格相去能幾許一水終疎
索言無寄書即思不在長守期約耳

傳聞織女對牽牛相望重河隔淺流誰分迢迢經兩歲
誰能脉脉待三秋情知唾井終無理情知覆水也難收
不復下山來借問更向盧家字莫愁

述異記天河之東有美麗女人乃天帝之子機杼女
工年年勞役織成雲霧綃縠之衣辛苦殊無懽悅容
貌不暇整理天帝憐其獨處嫁與河西牽牛之夫壻
自後竟廢織社之功貪惟不歸帝怒責歸河東但使
一年一度與牽牛相會古樂府迢迢牽牛星皎皎河
漢女纖纖濯素手札札弄機杼終日不成章涕泣零
如雨河漢清且淺相去詎幾許盈盈一水間脉脉不
得語隋史賀若弼謂高頊曰何脉脉耶註脉脉兩目

相看不相親之意梁王僧孺為人傷近而不見詩獨
我一心人同鄉不異縣異縣不成隔同鄉更脉脉脉
脉如牛女幽幽寄一語唐人詩話十里井不反唾引
南朝宋計吏瀉對殘草於公館井中且自言相去十
里豈當重來及其復至熱暍汲水遽飲不憶前所棄
草草結其喉而死俗因相戒千里井不反對遂訛為
唾耳然作唾字亦通太公先娶馬氏家貧馬氏求去
聽之後封營邱馬氏復來太公覆水於地令收之曰
覆水已難收矣漢何進欲誅宦官弟何苗謂進曰始
其從南陽來俱以貧賤依省內致富貴國家事何容
易覆水不收宜深思之且與省內和也梁武帝河中
之水歌河中之水向津流洛陽有女名莫愁十三能
織錦十四采桑南陌頭十五嫁作盧家婦十六生兒
似阿侯盧家蘭室桂為梁中有鬱金蘇合香頭上金
釵十二行足下絳履五文章珊瑚掛鏡爛生光平頭
奴子擎履箱人生富貴何所望何不早嫁東家王今

湖廣承天府漢江西石城有莫愁村云嘗進入
楚宮未知孰是下山人見蕩子從軍賦題註

代女道士王靈妃贈道士李榮

玄都五府風塵絕碧海三山波浪深桃實千年非易得
桑田一變已難尋

十洲記玄洲有大玄都仙伯真公所治五府亦仙所
居也碧海見高四篇齊威宣燕昭使人入海求蓬萊
方丈瀛洲三山此求仙之始三山別有員海統之水
正黑謂之冥海無風而洪波百丈不可得往來上有
九老仙人九天真王宮蓋太上真人所居惟飛仙能
到耳蟠桃蟠屈千餘里千年一開花千年一結實食
之令人長生西王母指東方朔謂漢帝曰此桃三熟
此兒已三偷之矣麻姑謂張方平曰自接待以來見

東海三為采田向到蓬萊水乃
淺於住者豈復將為陵陸乎

別有仙居對三市金闕銀宮相向起臺前鏡裡伴仙娥

樓上簫聲隨鳳史

成都市一歲之中二月望日鬻花木蠶器於其地者
曰蠶市五月鬻香藥於宮閨曰藥市鬻器用者曰七
寶市謂之三市晉都洛亦有三市一在城西南一在
城南一在城東北指成都言之也金闕銀宮見軍中
贈先還知已篇王充論衡羿請不死藥於王母羿妻
嫦娥竊以奔月是謂蟾蜍楊升菴云嫦娥因常儀占
月而誤也古音皆以儀為娥音如琴我作琴儀之類
是也近世有詩云竊藥奔月計已窮藁砧應恨洞房
空當時射日弓猶在何事無能近月宮此詩雖戲足
破嫦娥之謬矣方言秦晉之間凡好而輕者謂之娥

自關而東河濟之間謂之媼列子娥媼靡曼鳳史見
蕩子篇江總姬怨詩莫輕小婦狎春風羅襪也得步
阿宮雲車欲駕應相待羽衣未去幸須
同不學蕭史還樓上會逐嫦娥戲月中

鳳樓迢遞絕塵埃鶯時物色正徘徊靈芝紫檢參差長
仙桂丹花重疊開

鶯時春時鶯鳴之時也檢芝莖也張鷟奏章云芝泥
發彩宜鳳藻而騰文蘭檢浮香潤龍練而動色註檢
文書草也說文檢書署也蓋檢本芝蘭之莖葉書因
檢束之義而以芝蘭美之耳參差長短不齊之貌詩
參差荇菜仙桂見高四篇桂
有丹黃白三種丹者為上品

雙童綽約時遊陟三鳥聯翩報消息盡言真侶出遨遊

傳道風光無限極輕花委砌惹裾香殘月窺窓覘幌色

顏修內傳橋頭二子曰瑋曰瑞師事仙人盧子基於
隆慮山棲霞谷服飛龍藥一九千年不飢魏武帝詩
西山有雙童不飲亦不食莊子逍遙篇藐姑射之山
有仙人居焉肌膚若冰雪綽約若處子不食五谷食
風吸露乘雲氣御遊龍而遊乎四海之外其神凝使
物不庇屬而年谷熟註綽約柔弱貌又在宥篇綽約
柔乎剛強註音昌畧反即綽也曹植飛龍篇晨遊太
山雲霧窈窕忽逢二童顏色鮮好乘彼白鹿手翳芝
草楚辭三鳥飛以自南覽其志而欲化願寄言於三
鳥兮去颺疾而不得註三鳥本當時所見無定名也
寄此鳥中其離思耳又郭憲洞冥記武帝夢月臺有
三青鴨化三小童皆著青綺文儒各握鯨文大錢五
枚置帝几前身止輕重名輕影錢曹子建辨道論曰
三鳥被致不如百官之美也註神仙至當有鳥先導

當以楚辭為正記后二事以
廣異聞砌階石愧書帳也

箇時無數併妖妍箇裏無窮總可憐別有衆中稱黜帝

天上人間少流例洛濱仙駕啟遙源淮浦靈津符遠蒞

黜帝謂天帝下黜為人猶言謫仙也仙駕見洛濱對
雪憶謝二篇遠蒞地名左傳楚遠越繼于遠蒞註水
邊土人所止曰蒞楚詞朝余馬兮江皋夕濟兮西蒞
聞佳人兮召予將騰駕兮偕逝江文通效陸機詩流
念辭南蒞街怨別西津或云郭璞蒞則以
蒞作蒞矣謬甚浦津字義俱見詠水題註

自言小小慕幽元只言容易得神仙佩中邀勒經時序

簫裏尋思復幾年

韓詩外傳鄭交甫過漢皋遇二女袂服珮兩珠交甫與之言曰願請子之珮二女解珮與之去十步探之則亡矣廼顧二女亦不見楚詞遺余珮兮澧浦曹植神女賦願誠素之先達解玉珮而要之蕭裏尋思本鳳史意見

蕩子篇

尋思許事真情變二八容華識少選漫道燒丹止七飛空傳化石曾三轉

曹植美女篇借問女安居乃在城南端容華雜詩篇南國有佳人容華若桃李朝遊江北岸夕宿瀟湘汜又容華漢女官名秩比二千石尸子鬱攸之司九變七化皆火為之紀註靈丹九轉而成故不止七化也淮南子禹治水化為熊以通轅轅之道塗山氏見之而慙遂化為石禹曰歸我子於是石破北方而啟生

其石在嵩山見漢書註竟地即化石也劉義慶幽明錄陽羨小吏吳寵有主人在溪南嘗以一日掘頭舟過水溪內忽見一五色浮石取內牀頭至夜化成一女子又武昌北山上有望夫石相傳貞婦從其夫遠役赴國難携弱子餞送登山立望化而為石又永州城南八十里有石如人郡國志淮南王安敗至此化為石又如江郎之石之類皆云化成皆襲說也詩栢舟篇我心匪石不可轉也

寄語天上弄機人寄語河邊值查客乍可忽忽共百年

誰使遥遥期七夕想知人意自相尋果得深心共一心

弄機指織女與值查客俱見高四篇韓安國傳安國始貴后稍疏下遷衛青等新幸有功益貴安國默然也又為虜欺失亡多甚自愧幸罷歸乃東徙屯意忽忽不樂數月嘔血死期七夕見前篇

一心一意無窮已投漆投膠非足儼只將羞澀當風流
持此相憐保終始相憐相念倍相親一生一代一雙人
不投丹心比元石誰將濁水況清塵只言柱下留期信
好欲將心學松檟不能京兆畫娥眉翻向成都騁騶引

膠漆見靈泉頌又古詩以膠投漆中誰能別離此曹
植七哀明月照高樓流光正徘徊上有愁思婦悲嘆
有餘哀借問嘆者誰言是宕子妻君行踰十年孤妾
常獨知君若清路塵妾若濁水泥浮沈各異勢會合
何時諧願為西南風長逝入君懷君懷良不閒妾身
當何依尾生與女子期於橋下水至不去抱橋柱而
死虞子陽詩寒露拂凌茗女蘿辭松栢檟榮不終朝
蜉蝣豈見夕註檟木槿花朝生暮死也京兆娥眉見

時昔篇京兆謗註司馬相如貧困與臨邛令王吉友善往見之臨邛富人卓王孫聞令有客大為具席王孫有女文君新寡曉音樂相如因以琴心挑之文君夜奔相如遂與馳歸

青牛紫氣度靈關尺素顏鱗去不還連苔上砌無窮綠
脩竹臨壇幾處班

青牛句見送陳文林陸道士篇浮氣註又漢武內傳封君達隴西人服黃連五十餘年入鳥舉山服水銀百餘年還鄉里如二十年者常乘青牛故號青牛道士漢世書札相遺或以絹素疊成雙魚古樂府客從東方來遺我雙鯉魚上有長相思下有長相憶周宏讓答王褒書猶冀蒼鴈頰鯉時傳尺素清風明月但寄相思後世乃謂魚能傳書非也階石不行則有蒼苔江總為姬怨詩自悲行處綠苔生何悟啼多紅粉

落靈運直中書省詩紅藥當階翻蒼苔
依砌上班竹見前篇啼痕上竹生註

箇時空牀難獨守此日別離那可久梅花如雪柳如絲
年去年來不自持初言別去寒偏在何悟春來春更思
空牀句見蕩子篇題註何遜范雲聯句洛陽城東西
却作經年別昔去雪如飛今來花似雪又梁元帝別
詩門前楊柳亂如絲
直置佳人不自持

春時物色無端緒雙枕孤眠誰分許分念嬌鶯一種啼
生憎燕子千般語朝雲旭日照青樓遲暉麗色滿皇州
落花泛泛浮靈沼垂柳長長拂御溝

宋玉高唐賦楚襄王遊高唐夢美人曰妾巫山氏之神也朝為行雲暮為行雨朝朝暮暮巫山之下註朝雲喜晴暮雲喜雨故云朝雲暮雨詩春日遲遲暉日色也謝朓詩京洛佳麗遊春色滿皇州詩王在靈沼謝元暉鼓吹曲飛甍夾馳道垂柳蔭御溝

御溝大道多奇賞侯客妖容遞來往寶騎車花鐵作錢
香輪驚水珠為網

侯客見孫長史篇置驛五侯註車花鐵作錢以鐵為花粧車也網當作輞車輪緣邊橫木也以鐵作珠釘飾之令堅耐不磨也或曰如螢火賦所謂懸珠之網謂以珠為車帳然於香輪驚水之文欠通

香輪寶騎競繁華可憐今夜宿娼家鸚鵡杯中浮竹葉

鳳凰琴裏落梅花

繁華見疇昔篇鸚鵡螺名琢以為盃竹葉見送尹大詩琴之為言禁也以禁止邪心庖犧氏始造趙飛燕琴名鳳凰落梅古樂府曲具詞云念爾零落逐風颺徒有霜花無霜實

許革多情偏送款為問春花幾時滿千回鳥語說衆諸百過鶯啼說長短

衆諸長短判不尋千回百過浪關心何曾舉意西鄰玉未肯留情南陌金

宋玉登徒子好色賦臣東家之子增之一分則太長減之一分則太短著粉太白施朱太赤此女登牆三

年窺臣臣至今未許此云西隣玉指宋玉也秋胡子
久出遊歸遇婦人采桑於道以金遺之不受及歸乃
其妻也南陌字
見前篇莫愁註

南陌西隣咸自保還轡歸期須及早為想三春狹斜路
莫辭九折卽關道

江總閨怨詩顧君關山及早度念妾桃李片時妍阮
嗣宗咏懷詩捷徑從狹路龜勉促荒淫古樂府有長
安有狹邪之句故陸機梁武有長安洛陽狹斜機意
言世路險狹邪僻正直之士無所措手足武帝行已
見春霽早行篇調中婦註又隋後主越王侗楊叛兒
歌青春正陽月結絆戲京華龍媒玉珂馬鳳軫繡香
車水映臨橋樹風吹夾路花日昏歡宴
罷相將歸狹斜九折見費六還蜀篇

假令白里似長安肯使青牛學劍端
蘋風入馭來應易
竹杖成龍去不難

蘋風見淄州毛司馬秋九詠掩青蘋遊清風陶陽氣蕩春心竹杖成龍見出石門篇

龍颺去去無消息鸞鏡朝朝減容色
君心不記下山人
妾欲空期上林翼

宋范泰鸞詩序蜀賓王養一鸞三年不鳴夫人曰見其類則鳴懸鏡照之冲霄一奮而絕今徐州人畫鏡乃曰鸞鏡不知何義瑞應圖鸞者赤神之精鳳凰之佐雞身赤毛色被五采鳴中五音人君進退有度親疎有序則至或以鸞為鳳非也下山人見上篇上林翼用蘇武事見蕩子篇一鴈註石崇昭君詞願設飛

鴻翼乘之以遐征飛鴻
不我顧佇立以屏營

上林三月鴻欲稀華表千年鶴未歸不分淹留桑路待

祇應直取桂輪飛

華表見紫雲觀篇梁吳筠古意詩賤妾思不堪採桑
渭城南帶滅連枝繡髮亂鳳凰簪又曹植美女篇美
女妖且閑采桑岐路間又帝京篇羅敷
註桂輪見久戌邊城篇桂滿夕輪孤註

憶蜀地佳人

東西吳蜀關山遠魚來鴈去兩難聞莫恠嘗有千行淚
只為陽臺一片雲

梁吳筠別夏侯故章詩新知關山別故人河梁送沈
約送友人詩君東我亦西銜悲涕如霰江總別袁昌
州詩宕子嘆愁窮此別異西東關山嗟墜葉岐路憫
征蓬別鶴聲聲遠愁雲處處同關山見宕子篇魚鴈
見上篇庾信寄王琳詩玉關道路遠金陵信使疎獨
下千行淚開君萬里書陽臺一片雲見上篇朝雲註



欽定四庫全書

卷二

駱丞集卷二